

دارالفنون

ادبىياتى قارىلىنىشلىرى

فلسفه ، اجتماعيات ، تاريخ ، جغرافيا ، ادبيات

ايكى آيدە بر نشر اولنور

مىندرجات

روم ايللى شرقى مسئلهسى	• • • • •	على خوار
۱۱۴۸ - ۱۱۵۲ سفرى	• • • • •	احمد رفيع
توركيولر	• • • • •	نجيب عاصم
بكتاشيلرك جغرافى توزعى	• • • • •	راغب خاروصى

استانبول - دولت مطبعهسى

۱۹۲۸

روم ایلی شرقی مسدسی

برنجی صفحه

بالقائمه عسکر اقامه سی مقصدہ استفادہ ابرہہ مسی

برلین معاهده سنک ۱۳ ، و ۱۴ ، و ۱۸ ، و ۲۲ نجی ماده لرندہ بالقائمرک جنوبندہ روم ایلی شرقی نامنی آله جق و مختاریت اداره شرائطیلہ اودورک تعبیری وجه ایله ، طوغرودن طوغرویہ حکومت پولتیقیہ و عسکر بہ پادشاهی تختندہ بولونہ جق برایتل تشکیل اولندیغی بیان وحدود ملکیه سی تعیین قلنہ نقلہ برابر ذات حضرت پادشاهی نیک بوایالتک برآ و بحرآ حدودینی محافظه و بوحود اوزرندہ است حکاملر انشا وعسکر اقامه ایدرک مدافعہ سی اسبابنی استحصاله حتی اوله جنی ، و روم ایلی شرقینک امر تنظیمی باب عالی ایله بالاتفاق مذا کره ایتمک اوزره بر آروپا قومیسونی تعیین قلنہ رق والینک اقتدار ووظائفی وایالتک اداره ملکیه و عدلیه و مالیہ سنی تعیین ایله جکی ، و روسیه عسکری ، روم ایلی شرقی و بلغارستانده معاهدہ نیک تصدیقندن اعتباراً طقوز آی اقامت ایدہ جکی مندرج بولونمش ، و او وجهله ایالت مذکورہ نیک نظامنامہ داخلی دولت علیه ودول اجنبیه مأمورلرندن مرکب بر قومیسونی معرفتیلہ تنظیم وبارادہ سنیہ موقع اجرایه وضع ایدلمش ایدی . فقط روم ایلی شرقی حدودی اوزرندہ عثمانلی عسکری اقامه سی حقندہ کی احکام عہدیہ کرک بلغارلری و کرک روسلری ممنون ایدہ مدی . بلغارلر بونی آتیا بلغارستانک روم ایلی شرقی ایله اتحادینه مانع عد ایتمکده ، روسلرده کندیلرینه استانبول یولنی سد ایدہ جک اولان وسوق الجیش نقطه نظرندن حائز اهمیت بولونان بالقان کچیدلرینک دولت علیه طرفندن اشغالی آرزو ایله مه مکده اولدقلرندن اکا مانع اوله جق تدابیرک اتخاذندہ ایکی طرف اتحادیتدیلمر . عهدنامہ ایجابجه ایالتک تنظیم اداره سی برمنوال محرر بر آروپا قومیسوننه محول اولدیغی حالده روسلر آسایشک عدم استقرارندن بحثله روم ایلی شرقیدر تمديد اقامت و ایالت مذکورہ نیک بلغارستانله اتحادینه مساعد اوله بیله جک صورتده تأسیس اداره سنه مبادرت ایله دیلمر . حتی روسیه قومیسوری پرنس چوندوقرف فلہ وجوه واعیانہ خطاباً ایرادایتدیکی نطقده « واقع اولان معاونتکنز ثمره سی

اوله رق آ ز زمان ظرفنده روم ایلی شرقینک بالجه شعبات اداره سنه بلغارستانده موجود نظاماتک ادخالنه موفق اولدم . موقت اولان بو نظاماتک اکتساب قطعیت ایتمه سی مأمول قویدر . چونکه تاریخک جریانی بتون انسانی لک تدابیرندن اقوادر « دهرک مقصدینی اعلاندن چکینمه مشدر . فی الواقع مومی الیهک وضع ایتدیکی اساسات آوروپا قومیسو نتیجه تنظیم قانان نظامنامه، اساس اتخاذ اولونمشدر .

۱۸۷۹ سنه سی مایسنده روسیه عسکری روم ایلی شرقی بی تخلیه یه باشلا یوبده دولت علیه بالفان کچیدلرینی اشغال ایچون عسکر اعزامی تصویرینی میدانه قویونجه، بتون ایالتده هیجان افکار ظهوره کله رک کیتدجه اشتداد ایتدی . بلغارستان اهالیسی ده عثمانلی عسکری ادخالنه فعلاً ممانعتده بولونمق نیتنی اظهار ایله دی . بویوزدن بالقانلرده یگیدن اغتشاش وقوعی اندیشه سی حادث اولدی . او صروده آوروپا دولترلی ایسه محافظه صلح و سکونه طرفدار ایدی لر . روسیه دواتی ، دولت علیه برلین معاهده سی احکامنی تمامیه اجرا ایتک ایسته دیکی حالده ظهوره کله جک وقایعک وخامتنه آوروپای اقناعه چالیشه رق ، وبلغارستان وروم ایلی شرقی اهالیسنک نیات جنکجویانه لرندن بحث ایدهرک ، قونغرہ اثناسنده روم ایلی شرقینک برسنه مدت دولتر طرفندن مشترکاً عسکر سوقیه محافظه سی حقنده قونت اندارشی طرفندن واقع اولوب نتیجه سز قالش اولان تکلیفه رجوع ایدلمه سی اخطار ایتدی . فقط اساس مقصدی بوتکلیفک قبول و تطبیقی اولمایوب حال وموقعک وخامتنی آوروپایه احساس ایتمکن ، واهالینک مقاومت فکرنده بولوندقلرینه دولترلی اقناع ایله مکدن عبارت ایدی که ، نتیجه ده مقصد مذکورہ واصل اولدی .

بو خصوص حقنده دولتر بیدنده جریان ایدن مخبرات نتیجه سنده انکاتره خارجیه ناظری لورد سالسبوری طرفندن درسعادت سفارتی واسطه سیله باب عالی یه تبلیغ اولونان تاغرافامه ده دولت علیه نک برلین معاهده سی حکمنجه حائز اولدیغی حقوق تماماً محفوظ قالمق شرطیه روم ایلی شرقینک دولترجه اشغال مشترک آلتنه آلتنه سی تکلیف ایدلمکله برابر سلطنت سنیه طرفندن دخی اهتان ایله احوالی برغوسنک طوتولمه سی توصیه اولوندیغی کبی مختلطاً اقامه ایدله جک عسکر ماده سنک طرف شاهانه یه تبلیغنه سفیر طرفندن مأمور ایدلمش اولان باش ترجمانه اعطا اولونان تعلیماتنامه دده روم ایلی شرقی نظامانک تاسیسی ایچون تشکل ایدن مختلط قومیسوونک امری آلتنده بولونمق ، وقومیسوونک دوام ایده جکی مدت ظرفنده آسایش وانتظامی محافظه ایتک اوزره اون بش بیک کشیلک برقوه مختلطه عسکریه

سوقنه دولت لرحه موافقت حاصل اولدیغی و دولت علیه ده ایسترسه برغوس و اهتمان قربنده بر محله، و آندن بشقه بالقانلرده بر موقعه عسکر اقامه ایده بیله جکی بیلدیرلمش، و روم ایلیده اللی بیك بلغارک سلاحلارمیش اولمه سنه، و ما کدونیا ده بر عصیان ظهوری احتمالنه، و بویله بر عصیان وقوعنده یونانستانک دخی استفاده یه قالدیشه جغی محقق بولونمه سنه قارشى انکلتره دولت نجه خزینة مالیه نك مضایقه شدید سندن طولای و قتیله قوه کافیه یتیشدیر یله مه سنه. و روم ایلیده ظهور ایده جک براختلالک دولت ایچون خرابیت کامله یی انتاج ایده بیلمه سندن قور قولمقده اولدیغی بیانیله بوتصورك قبولی توصیه، و انکلیر و ایتالیا عسکری برابر بولونه جق اولونجه دولت علیه یه هیچ بر ضرر کله یه جکی تأمین ایدلمش ایدی.

بونک اوزرینه اهتمان و برغوسه عسکر سوقی مناسب و محذور دن سالم اولوب اولمایه جغنک دائرة عسکر یه جه مطالعه و مذا کره سیله نتیجه سنک عرضی اراده اولونمه سنه مبنی کیفیت غازی عثمان پاشانک تحت ریاستنده متشکل بر انجمن عسکر یده لدی المذکره ۲۳ مارت ۱۲۹۴ تاریخیه تقدیم قلنان مضبوطه بر لین عهد نامه سی حکمنه تطبیقاً روم ایلی شرقینک تشکیلاتی هنوز اجرا قلنماش اولمه سی جهتیله اهتمان عسکر سوقی هر نه طریق ایله اجرا ایدلسه آنجق حرباً ممکن اوله بیله جکندن، و عسکرک و صواندن صوکراده کریده قالان نقطه لر الده بولونمادجه ارزاق و مهماتنک تأمین سوق و اداره سی قابل اوله مایه جغندن، شیمدیلمک اهتمان عسکر اقامه سی غیر جائز بولوندیغی، و احوالی برغوسی ساحلده اولمه سیله طوتولمه سنده مشکلات یوق ایسه ده روم ایلی شرقی تشکیلاتنک اجرا قلنه مامه سندن و معاهده نامه موجبنجه بالقانلرده طوتولمه سی لازم کن نقاطک هنوز الده ایدیله مه سندن دولای یالکیز اوراسنک اشغال آلتنه آلتنه سنده محذور دن بشقه بر فائده و اهمیت عسکر یه کوروله مدیکى بیان قلنمه سیله، خارجییه نظارتندن ۳۱ مارت ۱۸۷۹ تاریخیه دولت لره تبلیغ اولونان تلغراف نامه ده اشغال مشترک فکرینه عدم موافقتله برابر روم ایلی شرقی اهالیسنه قارشى زجر و تهدید صورتنده تدابیره مراجعت ایدلمکسزین منفعت و وظیفه لرینی تقدیر ایتدیرمک قابل اوله جغی، و کندیلرینه آوروپانک نفوذ معنویسنی احساس ایله اکتفا اولوندیغی حالده عساکر اجنبیه سوقنه حاجت قالمه دن فسد و بدخواهانک تأثیرات مضره لرینک اوکی آلتنه بیله جکی یولنده بیان ملاحظات ایدلمش ایدی.

او صروده لوندره سفارتندن آلتان ۵ نیسان ۱۸۷۹ تاریخلی تلغراف نامه ده لورد سالسبورى، روم ایلی شرقیده مختلط عسکر اقامه سی حقنده دول معظمه طرفندن بیان

اولونان رأی و مطالعه بی باب عالینک قبول ایتمه سی آرزو سنده ایسه ده بوبابده واقع اولان مخالفته و ۳۱ مارت ۱۸۷۹ تاریخی تلغرافنامه ده سرد ای دیلن ملاحظاته بناء کیفیتی پترسبورغ قاینه سنه یازمغه لزوم کوردیکنی بیلدیرمش اولوب باش وکیل لورد بیقونسفلید ایسه صورت محرمانه ده « بن مختلط عسکر اقامه سی تصویرینک خلافتده ایم ، بو تدبیر مملکتیکز ایچون مشوم اولوب حکومت مستقله حالنده بقا گزه ایراث خلل ایده رک ممالک شاهانه نک مقاسمه سنه بر مقدمه اولوردی، رد ایتدیککزه ممنونم ، لیکن دولتکز برغوس واهتمانی طومغه حاضر اولوق اوزره نه قدر چوق عسکر کوندره بیلیرسه کوندرمه لی، وهیچ اولماز ایسه الی بیک منتظم عسکر سوق ایتمه لیدر. سزبونی یاپارسه کز بن ده ماده معاونت ایده جکمی، وایجاب ایدرسه سزه مظاهرت ایچون اردو و دونانما کوندره جکمی و عدایده رم. ا کر برغوس واهتمانی طوتمق ایچون لا اقل الی بیک عسکر سوقنه نیتکز اولما یوبده ادر نه ده طوپلادیغکز یکر می طابوری کافی کورر و قید سزلق ایده رک عسا کر مختلطایه لزوم کوسترر ایسه کز بن ده ایشدن الی چکر م، و ترکیه نک حانی وظیفه ایدنه یه رک سزی کنندی حالکزه براقیرم دیمش اولدیغی بیلدیر یه رک انکلتره دولتی باب عالی نامنه رسماً تأمین ایچون طلب مأذونیت ایدمشدر. بو مسئله ده انکلتره باش وکیلله خارجیه ناظرینک فکر لری و توصیه لری یکدیگرینه مخالف اولدیغی کبی ذاتاً روسیه مسئله سنک بدایتندن بری لورد بیقونسفلید ایله خارجیه ناظری لورد دربی، و آنک خلفی اولان لورد سالسبورری آراسنده اختلاف فکر و نظر موجود، و حکومت سنییه واقع اولان توصیه لری ده متخالف ایدی . بیقونسفلید دولت علیه لهنده اداره افکار و خارجیه ناظر لری دول سائر دنک افکار و تمایلاتنه متابعتله دولت حقنده شدت پولتیقه سنی التزام ایدردی. بو متخالف سیاست ایسه ذاتاً حرکاتنده متردد اولان باب عالی بی بسبوتون ترده دوشوروب شاشرتمشدر .

لورد بیقونسفلیدک بو توصیه سی اوزرینه خارجیه نظارتندن لوندره سفارتنه یازیلان ۸ نیسان ۱۸۷۹ تاریخی تلغرافنامه ده تبلیغات اخیره دن بری روم ایلی شرقیده هیجان افکار بر مرتبه واصل اولمشدر که قوه مادیه اولما دجه مذکور ایالتک برلین معاهده سی دائره سنه ارجاعنی امید ایتمک واهی اولدیغی، و بوقوت دولت علیه طرفندن سوق اولونورسه مجادله بی انتاج ایده جکی ، ولورد بیقونسفلیدک توصیه سی وجهله الی بیک کشیلک بر اردو سوق اولونمق و چتالجه و بولایر خط لری ده لایقی وجهله محافظه ایدمک لازم کله جکی ، و او یوله اقتضا ایدن مبالغ هر نه شکاده اولورسه اولسون دولت علیه اعطا قلنورسه بو اردونک

سوقی مشکل اولمایوب فقط عسا کر شاهانه روم ایلی شرقی به کیرنجبه مقاومتیه تصادف ایدہ جکندہ شہہ اولمادیغندن چکلمک اوزره بولونان روسیہ اردوسنک آرقہ سی صرہ مجادلہ و محاربه کورولتیلرینک حصولی روسیہ جه نہ تاثیر حاصل ایلہ به جکی جای نظر بولوندیغی کبی روسلر طرفندن بوکا قولاق ویرلمه دیکی فرض اولونسه بیلہ باغارستان امارتنک بالقانک بری طرفندہ کی بلغارلرک حرب وجدالنه فعلاً اشتراکی شہہ دن بری اولدیغندن، دولت علیه اختیار ایدہ جکی بونجه فدا کارلق نتیجه سنده ینہ ساده جه برلین معاهده سی احکامنه عودتمی، یوقسه احکام معاهده نک تعدیلله روم ایلدیجه اولان مو تعنی تأمینمی ایدیلہ جکی وبرنجی تقدیرده حاصل اوله جق نتیجه ایدیلن فدا کارلقه متناسب اولمایوب ایکنجی تقدیرده ایسه روسیہ ایلہ قارشی قارشی به کلنمش اوله جغندن دولت بونی یالکز باشنه در عهده ایدہ مه به جکی مطالعاتی بسط و تمهید اولوندقدن صو کرا حکومتہ نقداً معاونت ایدیلہ جکنه، وبرلین معاهده سنک تعدیل ایتدیریلہ جکنه، و روسیہ قیام ایدرسه انکلترونک فعلاً معاونت ایلہ به جکنه دائر تأمینات قطعیه و صریحه آمادجه دولت علیه نک بونجه زحمتلرله قورتولدیغی احوال مدہشہ به کندیسنی تکرار آتمق ایسته مه به جکی اشعار قلنمش، وبتون بوماده لر حقننده کرک لورد بیقونسفلید و کرک لورد سالسبوری ایلہ اتحاد افکار حاصل اولورسه ویره جکاری جوابک باب عالی به بیلدیرلمه سی، و عکس تقدیرده دولت، حاصل اوله جق بالجمله غوائلی بیلدیکی حالده عسا کر مختلطه اقامه سی ماده سنه موافقت ایتک مجبوریتندہ بولونه جنی علاوہ ایدلمشدر. بوبابده کی مخبرات مهمه نک نتایجی و بیقونسفلیدک جوابی حقننده معلوماته دسترس اولونه مایوب انجق او ائنادہ روسیہ ایمیراطورینک جنرال اوبروچف معرفتیله سلطان عبدالحمیدہ کوندرمش اولدیغی صورتی زیرده محرر، نامه ده مقاصد صلح پرورانہ سنه بر دلیل جدید اولمق اوزره مومی الیہی استانبوله اعزام، و روم ایلی شرقی اها ایسنده کندی نامه اوله رق وصایا اجر اسنه مأمور ایلہ دیکندن بجثله مساعی صلح پرورانہ سنده کندیسنه معاونت ایدیلہ جکندہ امیدوار بولوندیغی بیان وسوق عسکر ماده سنندن صرف نظر اولونمہ سنی ایما ایلہ مه سی، و مومی الیه طرفندن حضورده ایراد اولونان نطقده ده ایمپراطورک افکاری ایضاح ایدلمه سی اوزرینه مجلس وکلاجه جریان ایدن مذا کره نتیجه سنده تنظیم و تقدیم اولونان ۱۲ جمادی الاولی ۱۲۹۶ تاریخی مضبطه ده طرف سلطنت سنیه دن جنرال مومی الیه ویریلہ جک جوابک هم دولت علیه نک روم ایلی شرقی اوزرنده اولان حقوقنی تمامیلہ محافظه و همده ایمپراطور طرفندن تبلیغ ایدیلن آثار موالاته حسن مقابله پولنده و ایالت مذکورہ نک امراداره سنجه

دولتک اتخاذا ایله یه جکی مسالکه موافق صورتده بولونمسی لازم کله جکینه ، وبوکا دائر
 پترسبورغ و پارس سفارتلرندن النان تلغرافنامه لرده روسیه دولتک برلین قونفره سی قرارینی
 تمام ایله ایفا ایتکی التزام ایله مش اولدیغی کوستریلوب بزجه ده ایالت مذ کوره داخلنه شیمیدین
 عسکر سوق ایلمه سی ذاتاً مقرر بولوندیغنه بناءً دولت علیه دخی ایمپراطور مشارالیهک ابراز
 ایله مش اولدیغی مآثر مسالمتکارانه یه مقابلهً قونفره قراری موجبنجیه ایالت مذ کوره یه
 وبالقائلره عاقد حقوقنی تمامیء محافظه ایله برابر شیمدیلاک عسکر سوق وادخلی نیتنده
 اولمادیغنی بیان ایله اکتفا ایلمه سی تصویب اولونهرق اولبایده بالاستیدان صادر ارلان اراده
 سنیه ده روسیه دولتی طرفندن التزام ایملین معاملاتیه نظراً بزم طرفدن دخی حکیمانهدور
 اندیشانه طاورالمق لازم کله جکی جهتله سلطنت سنیه نک روم ایللی شرقی ولایتنه و بالقائلره عاقد
 اولان حقوقی وجهاً من الوجوه سکتهدار اولماق ، وتحشید قوه جنودیه یی ایجاب ایده جک برکونا
 حال و مجبوریت ظهور ایتهدکجه اورالرده عسکر بولندیرلما سی ید اختیارده اولمق اوزره آزر
 زمان ایچون سوق عسکر خصوصندن صرف اولنه جنی بیانیله اکتفا ایلمه سی تبلیغ اولونمشدر .
 جنرال اوبروچف استانبولدن قلبه یه عزیمت ایده رک روم ایللی شرقی اهالیسنه تبلیغ
 ایله دیکی بیاننامه ایمپراطوریده « ایچکزده بر چوقلرینک مابده نامه ایله احداث ایملین
 وضعیتدن غیر ممنون بولوندقلری و برتبدل ناکهانی ایله قرار دولییه مخالف بر مقصده واصل
 اولمق ایسته دکلری معلومدر . فقط دولتک آرزو و موافقتلری اولمادقجه حصولی غیر ممکن
 بولونان و ممالکتکز حقتده بر طاقم یکی مصائبی دعوت ایده جک اولان بو فکری تصویب
 ایده مم . بناءً علیه هنوز وجوده کلکه باشلایان ملیتکزی کو کندن محو ایده بیله جک بویله آمال
 غیر مشروعه نک اوکنه کچمکه چالشه کزی توصیه ایدرم » زمیننده اجرای وصایا ایلمش
 اولدیغی کبی جنرال مومی الیه کندی نامه اوله رقدده « ذات شاهانه اهالیء محلیه جه هر درلو
 عدم امنیت فکری نک زائل اولمه سی ایچون عساکر عثمانیه نک شیمدیلاک شرقی روم ایللی یه داخلندن
 صرف نظر ایله مشدر . آوروپا دولتلری دخی شیمدیکی حالدیه بر مقصد عسکری ایله بالقائلرک
 اشغالی فائده سز اوله جغنی اکلامشدر . شو حالدیه بونک بر مقصد سیاسی ایله ده اجراسنک
 فائده سز لکنی اثبات ایتک سزه ترتب ایدر . لایقلی بر حرکتله ایالتک تأسیس اداره سنه
 چالشکز ، و برلین معاهده سی مقرراتی خلافتیه اوله رقد ذهنکزدن هر درلو اختلال فکرینی
 چیقاریکز ، سزه آچیق اوله رقد سویلرم که نه روسیه ، ونه ده آوروپا آرتق سزک ایچون
 برطامله قان دوکمک ایسته مز » سوزلرینی علاوه ایتمشدر .

شرقی روم ایلی یه عسکر سوقندن صرف نظر اولونمسی و جنرال او بروچفک فلبه ده ایراد ایتدیکی نطقک مؤداسی انکلتزه یه انعکاس ایدنجه ، لورد سالسبوروی لوردلر قارده سنده ایراد ایله دیکی نطقده «ذات شاهانه نك عسکر اقامه سندن کنرینسی منع ایدرجک برتعهدده بواونمش اولمسنی ظن ایتیم. شو قدرکه معاهده نك بوشرطی بعضیلرینک ظنی کبی مجبوروی اولمایوب ذات حضرت پادشاهی حفظ حدوت ایچون عسا کر محافظه اقامه سی حقنی حائز اولدیغندن بونی امور مالیه و پولتیقه نك مساعد اولدیغی بر زمانده اجرا ایدرلر. بوندن حق مذکوروی ترک ایتیمک و یا خود عسکر اقامه سنی الی غیر النهایه تأخیر ایلامک نیتی آ کلاشلماز . ذات شاهانه نك، مملکتلرینک محافظه سی امرنده بویوک اهمیتی اولان برحقندن فراغت ایده جکلرینی هیچ قبول ایتمز ایسه مده فرض محال اوله رق بر سوء نصیحته تبعیت ایده جک اولسه لر بیله بونک ترکی یالکیز کندیلرینک النده اولدیغی اعتقادنده بولونمق خطادر. چونکه بوبابده برلین معاهده سنی امضا ایدن سائر دولتلرک ده موافقتی لازمدر » دیمشدر .

بوصورتله دوات علیه ، بالقانلرده عسکر اقامه سندن ، حقوقاً دکل ایسه ده ، فعلاً صرف نظر ایتیمکه روم ایلی حدودینک محافظه سنججه الک قوی تأمیناندن محروم اولدی . آرتق روم ایلی شرقی اهلینسی دائرة اطاعته ارجاع ایچون الیه واسطه قلمادی . آندن سوکرا روم ایلی شرقی ، بلغارستاندن اخذ قوتله اسباب مدافعه سنی احضار ایدهرک آتیده کوروله جکی وجهله آچیقندن آچیغه ایقاع اختلال خصوصنده سربست قالدی . اوصرده انکلتزه ده سربستی فرقه سنک موقع اقتداره صعودیله انکلتزه پولتیقه سی ده عایهمزه تحول ایدهرک سالسبورینک نطقنده بیان ایتدیکی کبی احکام عهدیه نك محافظه سنه نه انکلتزه دولتی ، ونده دول سائر عطف اهمیت ایتهدی . برلین قونفره سنک باشلیجه سبب انعقادی اولان بر ماده نسیاً منسیا حکمنی آلدی .

فقط بلغارلرک کیتدکجه سرکشانه بر شکل آلمده اولان وضعیتلری و امور داخلیه لری حقنده وقوع بولان اخطاراته قارشى عدم خشنودی کوستر مکنده اوله لری روسیه یی ایقاظ ایدهرک دولت مشارالیه ، بالقان اقوامنده حاصل اولان ملیت واسه استقلال تمایلاتنک کندی نفوذینه ایراث ایدم جکی مضراتی تأمل ایله ، اولجه تشویق ایتمش اولدیغی حرکات ملیه نك اوکنه کچمک ایسته دیسه ده آرتق ایش ایشدن کچمش ایدی . بلغارستانده محافظه کار و حریت پرورلرک روسیه عایهنه اتحادلری روم ایلی شرقی قیدده عکس تأثیر حاصل ایدهرک مملکتک استقلالینی تأمین مقصدیله کرک روسیه یه و کرک دولت علیه قارشى بر فرقه مخالفه

وجوده کادی. باب عالی روسیه نیک طلبی اوزرینه، بلغارلره مماشاتکار اولان علقو پاشایی روم ایلی شرقی والیلکندن عزل ایله مستشارلغنده بولونان غوریل افندی بی والی تعیین ایتدیسهده بوده فرقه مخالفه نیک مملکتک هر طرفنده اجرا ایله دیکی تأثیراته مانع اوله مادی. شو صورتله ۱۸۸۵ تاریخنده ظهور ایدن اختلال نتیجه سنده شرقی روم ایلی و بلغارستان اتحادی حصول بولدی.

بالاده بیان اولو بدینی اوزره شرقی روم ایلی نیک بر آن اول اشغالی ایچون وقتیه لورد بیقونسفلیدک وقوعبولان تکلیفنه قارشى، بر این معاهده سنک تعدیل احکامی و روسیه علیهنده اتفاق عقدی کبی محالاته تعلیق ماده اولونمایوبده یالیکز معاونت مالیهیه حصر مطلب ایدلسه ایدی عسکر اقامه سی کیفیتنک موفقیتله حصول پذیر اوله سی مأمول قوی ایدی. هرناصله عسکر اقامه سی کوزه کس دیر یله مه یرک اک بویوک بر حق عهدی وضمان قوی الدن چیقارلمش اولدی. بوده روم ایلی شرقی و بلغارستانک اتحاد واستقلالانی، ونهایت بالقان حربنی انتاج ایدرک روم ایلی قطعته مهمه و وسیعه سی غائب ایدلدی.

اجرا ایتدیکم تدقیقات و تبعاتدن حاصل ایله دیکم فکره کوره اجزای ممالکدن بری بر کره اکتساب امتیاز و مختاریت ایدنجه، سلطان عبدالحمید آرتق آنی مملکتدن کانیاً انفکاک ایله مش عد ایدوب بالاخره توسیع امتیازی و یا تغییر شکل ادارسی یولنده واقع اولان تشبثاته قارشى او اوغورده اختیار فداکاری ایتک ایسته مه یرک وایشی زمانه حل ایتدیرمک ایچون جریان طبیعیه سنه براقهرق مخابرات دورا دور ایله امرار اوقات ایله مش، و بر درلو عسکر سوقی جهتنه یاناشما مشدر. روم ایلی شرقی مسئله سنک ایکنجی صفحه سی تشکیل ایدن بلغارستان اتحادنده، وینه او ائنده حادث اولان مصر مسئله سنده طوتولان مسلک بونی واضحاً ارأه ایدر.

روسیه ایمپراطورینک جنرال اوبروچف معرفتیه ارسال ایله دیکی نامه نیک

صورت مترجمه میدر :

وقوعات اخیره شرقیه دن صوکرادخی دوام ایدن هیجانلرک تسکینه ، مقتدر اولدیغم درجه ده یاردم ایتک آرزوی قطعیه سنده بولوندیغمی مقدا طرف شاهانه لرینه تأمین ایله مش ایدم . اولباده ذات هایونلرینه بر دلیل جدید اولق اوزره یاور حربمز جنرال اوبروچفی

مقاصد صلح پرورانهم حقننده کیمسه نك شبهه سی قالمق ایچون استانبوله عزیمته مأمور ایتدم ، مومی الیه روم ایلی شرقی اها ایسنه نام مخلصانه مه اوله رق بو یولده افاده مرام ایتمکه ، ونم منافع ایله انلرک منفعتی ، ودولت علیه ایله آوروپانک منافی ، برلین معاهده سنک خالصانه اجراسنی اقتضا ایله دیکنی ، وکندمجه بونی اجرا ایتمکه قرار ویرمش اولدیغمی ، واکا سد چکیله جک اولورسه کندی کندی لرینه ضرر ایتمش اوله جق لرینی ، آچیقدن آچیغه اهالی مرقومه یه تأمین ایله مکه مأموردر . هیجان اذهانه نظراً بر شراره دن بر حریق ظهور ایده بیله جک بویله بر زمان نازکده ذات ملوکانه لرینک حکومت عسکریه موقته مک معاونتیه سائقه عمومیه به قارشى مجادله ایدن ارباب اعتدالی حسن اداره ایده رک ، وضبط وربطدن عاری قالان اعراضی یکدیگرینه دوشوره جک هرکونه تدبیردن اجتناب ایله یه رک ، مساعی مصلحانه مده ثنورلرینه معاونت بویوره جق لرینی امید ایده رم . شو مسلك معقوله برلکده سلوک ایتدی کمز حالدده شرقک صلح و آسایشنی اعاده مقصدیله تصدیق وقبول ایله دیکمز معاهدانک احکامی دائرہ سنده حرکت ایتمش اولورز ظننده ایم . بو صورتله صلح و مسالمتی تأییده ، وذات ملوکانه لر یله ثنورلرینک منافعنی چار وناچار علاقه دار ایده جک یکی بحر انلر ظهورینی منعه موفق اوله جغمزی مأمول ایلرم . بن ذات حضرت پادشاهیلرینه قارشى نصل اعتماد ایتمک ایسته یورایسه م ذات شاهانه لری دخی ثنورلرینه اولوجهله اعتماد بویوره بیایرلر . مقاصد مصلحانه وائتلافکارانده وقوعه جق اشترا کمز ، ثنورلرنجه آرزو اولونان و ظنمه کوره منافع متقابله مزده موافق بولونان حسن اتفافی بینمزده حاصل ایده جک اولورسه ، کندی کندی عن صمیم قلب تبریک ایدرم . جنرال او بروچنی توجهات حسنه تاجداریلرینه توصیه ایله برابر طرفدن سویله یه جکی شیلره وحرمت خالصه و مراعات عظیمه مه رائر طرف شاهانه لرینه تبلیغ ایده جکی تأمیناته اعتماد بویورمه لرینی رجا ایلرم .

۱۱ نisan ۱۸۷۹

ایکینجی صفحه

روم ایلی شرقینک بلغارستانه انجاری

بلغارستان امارتی روسیه دولتک اختیار ایله دیکی مادی و معنوی فدا کارلقلر نتیجه سنده تشکل ایتمش اولدیغندن دولت مشارالیها بلغارستانده ادامه نفوذ ایتمک ، ومملکتی کندی

وصایای آلتندہ یا شاتمق املندہ ایدی. بلغارلر ایسه بر کره نائل استقلال اولونجه، ایچلرنده اَمال ملیه اویانارق بر حکومت اجنبیهنک تحت نفوذ و وصایتندہ دکل، بر حکومت ملیه شکنده ترقی و توسعه ایله مک، و برلین معاهده سیله دائره حدودی تنقیص ایدیلمن بویوک بلغارستانی وجوده کتیرمک آرزوسنه دوشدیلر. و مملکتک حقیقی استقلالانی تأمین مقصدیله، و محافظه کار و حریت پرورلرک اتحادیله، روسیه علیهنده برفرقه ملیه وجوده کتیردیلر. بوفکر استقلال، معاهده مذکورہ ایله بلغارستاندن آیراش اولان و اَمال ملیه لری تمامیله تطمین ایدیله مهین روم ایلی شرقی یهدخی سرایت ایدهرک کرک روسیه و کرک دولت علیه قارشی اوراجده برفرقه ملیه وجوده کلدی. دولتجه بالیقانلرک قوه عسکریه ایله الده طوتولمه سی حقنده کی صلاحیت عهدیهدن استفادہ ایدیله مه یهرک بو حقتک استعمالندن صرف نظر اولونجه، اویله بر قوه تهدیدیهدن آزاده و حرکتلرنده بسبوتون سربست قاهره ق امال ملیه لرینی تأمینہ اک بویوک انکل عد ایتدکری برابطه یی قیرمق صورتیله دولتدن افتراق و بلغارستانله اتحادہ عزم و نیت، و فرقه مخالفه رؤسای خلتی علناً قیام و اختلالا دعوت ایله دیلر. بوفکر لرینی اجرا یهدہ بلغارستان پرنسی علیکساندر دوباتنبرخی آلت ایتدیلر. مقصدہ وصول ایچون آوروپا دولتلرندن قوی بر مظاهر تدارک ایتک لازم کلدیکندن پرنس علیکساندر، انکلتره خاندان قرالیسیله اولان مناسبت صهریه سندن بالاستفاده، انکلتره دولتک مظاهر تی جلب ایچون انکلتره یه عزیمت و عودت ایله دکن صو کرا روسیهنک وساطتنه مراجعت اولونمق سزین روم ایلی شرقینک بلغارستانله اتحادی اعلان ایدلدی. و وقعه شو وجهله ظهوره کلدی:

قلبه ترننک شرقی روم ایلی میلیس عسکری طرفندن آلیقونیلوب تلغراف خطنک تعطیل ایدلمش اولدیغنه ۸ ذی الحجه ۱۳۰۲ تاریخنه مصادف ۱۶ ایلول ۱۳۰۱ تاریخنده، اک اول ادرنه تلغراف مدیرینک تلغرافنامه سندن اطلاع حاصل اوله رق صدر اعظم سعید پاشا روم ایلی شرقی و ادرنه ولایتلرندن استیضاح کیفیتله برابر مابینه ده اعطای معلومات ایله مش اولدیغی کبی ادرنه والیدکنندن و بلغارستان قومیسر لکنندن متعاقباً آلمان معلومات متممه اوزرینه روم ایلیده کائن ولایات سائرہ یه و مقام سر عسکری یه دخی تبلیغات اجرا اعطا ایتمش، و برلین عهدنا، سنک اون آلتنجی ماده سنده روم ایلی شرقی ایالتنک امنیت داخلیه و خارجیہ سی تهدید اولوندیغی تقدیرده باب عالی اولب ابدہ ویریلن قراری واسباب موجبہ سنی سفرای اجنبیه یه بیلدیره چکی محرر ایسه ده والی طرفندن اویله بر طلب واقع واستشعارات واقعنک جوابی وارد اولماد یغندن، و بلغارستان قومیسر لکننک اشعار اتندہ

غوریل پاشانک اسقاطی مروی اولدینی مندرج بولوندیغندن ، یارینه قدر دها ساثر معلومات استحصال قلمور ایسه آنلرک دخی علاوه سیله کیفیتک بعدالمعایده هیأت وکلاجه تدقیق ومذاکره سنی ۹ ذی الحججه ۱۳۰۲ و ۷ ایلول ۱۳۰۱ تاریخی تذکره خصوصیه ایله عرض واستیذان ایله مش ، و پیدری آلنان معلوماتدن شرقی روم ایلیده میلیس عسکر یله برقاچ یوز بلغار کویلو سنک فلبه حکومت قوناغنه هجوم ایله والی غوریل پاشایی بر آرابه یه ارکاباً تحت الحفظ فلبه دن اخراج ، وتاغراف خطلرینی قطع ، وادرنه تره تی تعطیل ایدرک ، بلغارستانله اتحادلرینی اعلان ایله دکلری وبلغارستان پرنسنگ ده فلبه یه متوجهاً روس جقدن حرکت ایتمش اولدینی ومیلیس عسکر یله مخلوط بر طاقم باشی بوزوقلرک دخی ادرنه ولایتی حدودینه کلدکلری حالده تدابیر متقابله عسکر یه یه توسل ایدیلدیکی آ کلاشله مشدر .

بیرام کونی معایده رسمی متعاقب هیأت وکلا بااراده سنیه مابینده بالاجتماع تحریرات خارجیه کتابتی واسطه سیله سفارتلردن آلنان وادرنه ولایتیله بلغارستان قومیسر لکنک و آژانسلرک تاغرافلردن استنباط ایدیان معلوماته کوره وقعنه نک صحتی تحقق ایتمه سنه مبنی شرقی روم ایلی حکومت واهالیسی ایله بلغارستان پرنسنگ شو حرکات عصیانیه یه قارشى حقوق دولتک محافظه سی نه کبی تدابیر اتخاذیله قابل اوله بیله جکی ملاحظه وتأمل اولوندقده بوبابده ایکی طریقدن برینه کیدلمک لازم کلوب ، بریسی دولتله بیان شکایتیله پرنسنگ وروم ایلی شرقینک دائره عهدیه لرینه ارجاعی طاب اولونمق ، دیکری دخی هر دولت و حکومتک وظیفه اساسیه حکمرانیسی مقتضاسندن اولدینی اوزره حکومت سنیه جه تسکین عصیان ومحافظه حقوق ایچون قوه عسکر یه یه مراجعت ایدلمک اولدیغندن ، واکرچه طرف دولت علیه دن روم ایلی شرقیه عسکر سوقی عهداً والینک طلب و اشعارینه متعلق ایسه ده والینک حکومتدن ومیلیس قوماندانک مأموریتندن اسقاط ایداش وبلغارستان پرنسنگ حدودی تجاوزله مملکتی ضبطه قیام ایله مش اولدینی اشعارات واقعه دن آ کلاشیلدیغندن ، هرایکی جهتک محاذیر ومضراتی بالتأمل ، برطرفدن اسباب موجبیه سی دولتله تبلیغ اولونمق اوزره همان عسکر سوقی تدبیری ترجیح ایدلمش ، وادرنه دن سوق اولونه جق عسکره بدل قوه عسکر یه ترتیبی ایچون ده تدابیر لازمه یه مسارعت قلمه سی تحت قراره آلمشدر .

آنجق کامل پاشانک خاطر اتنده محرر اولدینی اوزره اوزمان اوقاف نظارتنده بولونان پاشای مشارالیه ، ادرنه ده موجود عسکرک مقدارینی سر عسکر غازی عثمان پاشادن سوال ایدرک موجودک یدی بیکدن عبارت بولوندیگی آ کلاشله سیله اومقدار عسکرله بلغارلره

قارشی نتیجه سی مجهول بر محاربه یه کیریشمک موافق حکمت اولمادیغندن تهیمات عسکریه یه مبادرت اولونمقله برابر دول معظمه ایله بالمخابره وسائط سیاسیه ایله استاتوقونک اعاده سنه تشبث ایدلمه سی رأینده بولونوب مالیه ناظری ذهنی افندی (پاشا) ده آنک رأینده اشتراک ایله مشدر .

مذاکره واقعه اوزرینه قلمه آله جق مضبطه نك تبیيض اولونمهدن اول مسوده سنك عرض وارانسی جمله اراده سنیه دن اولم سنه مبنی اولم اباده تنظیم قلنان مضبطه مسوده سی طرف صدارتدن صورت خصوصیه ده عرض ایدلمه سی اوزرینه نزد شاهانه ده مظهر قبول اولم ایهرق صدراعظمه تبلیغ قلنان اراده خصوصیه ده « مضبطه مسوده سنه همان بو کون یارین روم ایلی شرقی یه عسکر سوقی تذکر اولنیور . حال بو که مقام سر عسکرینک افاده سنه کوره باغار و روم ایلی شرقی قوتنک تقریباً آلمش یتش بیک نفر راده سنه اولدینی حالدیه طرف سلطنت سنیه دن ترتیب اولنه جق ردیف طابورلرینک مجموعی ادرنده کی قوتله برابر قرق سکر طابوردن عبارت اولوب اشبو قوتک محل اختلاله سوق ایدیله جک راده دن پک دون اولسنه وبهمه حال بر احتیاط قوتنک لزومنه و بو قوتک جمع و ترتیبی بر آرز و قته محتاج بولمسنه نظراً مضبطه مسوده سی مفادیله تذکره سر عسکری میاننده مبانیت بولنمده در . بناء علیه مسئله نك اهمیتی و نزاکتی جهتیه بر طرفدن سوق ایدیله جک قوتک جمعیه برابر دیگر طرفدن برلین عهدنامه سی احکامنه بغیر اولهرق بلغارستان پرئسی طرفندن ولایات شاهانه دن بری اولان روم ایلی شرقی یه هجوم و استیلا و قوعبولدیغندن و اشبو حرکت حقوق سلطنت سنیه یه مخالف و شایان تأدیب بر حرکت خصمانه دیمک اولوب بونک قوه کافیه سوقیه تسکینی اقدم وظائف دولتدن بولندیغندن دول متحابه طرفندن پرئسک حرکت باغیه سنک تقبیحیه روم ایلی شرقیدن در حال خروجی ضمننده نصایح شدیدیه اجرا اولنهرق صوفیه یه رجوع ایلمسنه موفقیت حاصل اولدینی حالدیه حکومت سنیه ده پرئسک حرکت واقعه سی نظر عفو ایله مسکوت براقه جغنگ و عکسی تقدیرده محل اختلاله قوت کلیه سوقنه مجبوریت حاصل اولهرق بو آرالقه ارباب طغیان طرفندن اهالی حقنده ظهور ایدله جک حالات غیر مرضیه دن ترتیب ایلیه جک مسئولیتک انلره عائد اوله جغنگ سفرای سلطنت سنیه معرفتیه دولتله تبلیغی و کله جک جوابلره کوره تعیین و تعدیل حرکت ایدلمی مناسب مطالعه بیورلمده اولدیغندن و مضبطه مذکوره ایشک بو جهتلرینی کاهی حقها

تعمیق ایلمدیکندن بورالری دخی حاده تدقیق ومذاکره دن کچیریلهرک نتیجه مذاکراتک عرضی « امر اولونمشدر .

بونک اوزرینه هیأت وکلا تکرار سرایده اجتماع ایددرک ، واو صره ده باغارستان پرنسک فلبیه مواصلتله اوراده کی اهالی وعسکر برلشمش وحکومتی ید اداره سنه آلمش اولدیغنه دائر ورود ایدن تلغرافنامه سی ده مطالعه اولونهرق ، یکیدن اجرا قلنان مذاکره نتیجه سنده تنظیم وعموم هیأت وکلا طرفندن تختم قلنمش اولان ۱۱ ذی الحججه ۱۳۰۲ و ۹ ایلول ۱۳۰۱ تاریخلی ایکنجی مضبطه ده « بو مثللو حادثاتده اتخماذ اولنه جق تدابیر اوچ صورتدن عبارت اولهرق برنجیسی حصراً تدابیر دیپلوماتیقیه دیکری ینه حصراً قوه عسکریه ینه مراجعت اولنسی اوچنجیسیده هرایکیسنک برلکده اجرایی اولوب موضوع بحث اولان باغارستان اتحادی تشبثاتک کسر وابطاننده مقصد دولت علیه نک تأمین اولنه بیلیمسنه ایسه منحصرأ تدابیر دیپلوماتیقیه کافی اوله میه جنی کبی شرقی روم ایلینک آسایشی تهدید اولندقدده دولت علیه نک اورایه عسکر ادخالیه بعده سفرایه اخطار کیفیت ایلمسی برلین معاهده سی احکامندن اولقله تدابیر دیپلوماتیقیه نک تدابیر عسکریه دن صکره اتخماذ اولنسی طبیعی کورنمسنه نظراً درحال ادرنه دن شرقی روم ایلی ینه سوق عسکره مبادرت وبرطرفدن قوه ظهریه ینه مسارعتله سفیرلره دخی اعطای معلومات اولنسی تذکر قلنمش اولدینی حالده ادرنه ولایتنده موجود عسا کر شاهانه متفرق مواقعه بولندیغندن آنلرک سوقی حالنده یرلرینه قونه جق وقوه الظهر اوله جق عسکرک جلب وجمعی دخی برارز وقته محتاج اوله جنی طرف سر عسکریدن ویریلان توضیحاتدن آ کلاشیلیمسی وپرنسک فلبیه مواصلتله حکومتی ید اداره سنه آلمش اولنسی وپرنسک حرکاتنه دولتلرک موافقتی علائمی کورلمسی برطرفدن دولتله مراجعت اولنسی وبرطرفدن دخی عسا کر شاهانه نک جهت عسکریه جه کوریلان نقصانک جلب وجمعیله لدی الحاجه ادرنه دن ایلرویه سوچه صالح حاله قونلمسی ایجاب ایتمش وبو صورتده اتحاد افکار حاصل اولمش اولدینی ودول معظمه نزدنده اجرایی مناسب کورینان تشبثات حقنده سفرای سلطنت سنیه ینه یازلمسی تذکر اولنان تلغرافنامه مسوده سنک ده تقدیم قلندیغنی عرض ایلمشدر .

بو باده ۱۲ ذی الحججه ۱۳۰۲ و ۱۰ ایلول ۱۳۰۱ تاریخیه صادر اولان اراده سنیه دهده سفرایه یازلمسی لازم کلان تلغرافنامه نک همان کشیده سی و طرف سر عسکریدن ترتیب وسوق اولنه جق عسا کر نظامیه وردیفه وطوپچی وسواری وپیاده طاوورلری

ترتیب ایدلجک، پیدرپی عرض کیفیت اوله رق شرقی فصادر اوله جق امر وفرمان هایون وجهله حرکت ایدلمسی وهر حالده ایلروده مشکلاتی و تهلکینی ووخامتی وبر بیوک محاربه پی منتج اولیه جق صورتده دولت وسلطنت سنیه نك هر درلو تهلکدن وقایه سی خصوص معتناها سنه زیاده سیله دقت واعتنا ایدلمسی « امر اولونمشدر .

عینی کونده مشارالیه کامل پاشا ایله اسبق باش وکیل عارفی، وغازی احمد مختار، وسرور پاشالردن مرکب مابینده برانجمن خصوصی عقد، وبوتلغرافنامه مسوده سی مذکور انجمنك تدقیقنه حواله ایدیلرک نتیجه مذاکرته تنظیم ایلدکلری ۱۲ ذی الحجه ۱۳۰۲ و ۱۰ ایلول ۱۳۰۱ تاریخلی مضبطه خصوصیه ده سفارتلره یازیله جق نوطه نك همان رسالی لزومی بیان، وبعض مرتبه دها مؤثر برحاله افرانغی ایچون وارد خاطر اولان تبلیغاتی حاوی قلمه آلنان ورقه نك تقدیم اولوندیغی اتیان قلمقله برابر روسیه سفیری نلیدوفک جلیبیله نام شاهانه یه اوله رق روسیه ایمپراطورینك حقانیت وعهد پرورلکینه استناداً طلب معاونت وسفیرکده بو یولده صرف مساعی ایللمسی اخطار اولونمسی، وپرنس بسمارقک دخی بوبابده رای ومعاوتی مطلوب اولدیغنه دائر برلین سفارت سنیه سنه تلغراف یازلمسی، وادرنده قوه عسکریه حالاً و آتیا الزم اولدیغندن بوکاده شیمیدین باشلانمسی عرض ایدلمشدر . سالف الذکر اراده سنیه ده سفارتلره یازیله جق تلغرافنامه یه علاوه سی امر اولونان فقراتک تمامیه بو مضبطه دن ملهم بولوندیغی آکلاشلمشدر . بو بابده سفارتلره یازیلان تلغرافنامه عیناً درج اولوندی :

« روم ایلی شرقی ایله بلغارستان امارتنده ظهور ایدن وقوعات بوجه آتیدر : بلغارستان پرنسی ذات شوکتسمات حضرت پادشاهی یه ارسال ایلدیکی تلغرافنامه ده روم ایلی شرقی حکومتی دوشرلمش اولدیغندن اهالینك کندوسنی پرنس اولان ایلدیکنی وبلغار اهالیسی بونصبی قبول ایتنی بالانفاق کندوسندن طلب ایلدیکی جهتله فلبه یه واصل اولدیغنی واسکی ایاتک اداره حکومتی اله الدیغنی بیان ایدیور. وبوالحاقک حکومت سنیه یه قارشو برکونه مقصد خصمانه یه مبنی اولیه رق اجرا ایلدیکنی وذات شوکتسمات حضرت پادشاهینك « سوزرنته » یعنی حق حمایه سنی تمامیه تصدیق ایلدیکنی بیان ایتدکن صکره ایکی مملکتک آسایشی وجنس ومذهبه باقلمیه رق اهالینك امنیتی ایچون ضامن اولدیغنی علاوه ایتمکده وذات حضرت پادشاهیدن تبعه شاهانه لری حقنده کی لطف نامحدود ملوکانه لرینی برکره دها اثبات بیورملرینی وحقوق متبوعیتنه خلل کتورمکسزین یاپیلان اشبوالحاقی تصدیق ایللرینی

رجا ایتمکده در. پرنس علیکساندر شهبه سز بلغارستانده اجرا اولنان تحریکات ایله ظهوره کلان اشبو وقوعاته نه ماهیت ویرسه ویرسون وقوعات مبحوئه برلین معاهده نامه سی احکام اساسیه سندن برنی علناً نقض ایدر. حکومت سنیه شمیدی یه قدر روم ایلی شرقیده کی تبعه سنک تأمین سعادت حالی ایچون لندن کلدیکنی اجرا ایتمش وبلغارستان کندی طوپراغنده وقوعه کتوریلان حرکات اختلاجویانه نی دفع و تنکیل ایلدیکنی بالدفعات قطعاً تأمین ایتمش و پرنس دخی حکومت متبوعه یه قارشو اولان صداقتی حقنده مکرراً تأمینات قطعیه ویرمش اولدیغندن وقوعات مذکوره حکومت سنیه جه برقاتدها تأثیرالیم واستغراب عظیمی موجب اولدی. دولت علیه بو درجه وخیم برحاله قارشو قیدسز برحاله قالدیه مز. بناء علیه کندو وظائفی بیلدیکی جهتله حقوق طبیعی سینه استناداً و برلین معاهده سی اون التنجی ماده سنک کندوسنه اعطا ایلدیکی صلاحیتی استعمالاً اختلالی تسکین وایالتی اشبو سند دولیدن منبعث حال وموقعه ارجاع ایچون عسکرله مداخله یه قرار ویرمشدر. مع مافیه قوه جبرییه مراجعت ایتمزدن اول سفک دمائی منع ایتمک ووسائط مصلحانه بی مسامحه ایلدیکی سرزنشنه دوچار اولماق آرزوسیه حکومت سنیه قابیتولره مراجعتله پرنسی دائرة استقامت واطاعت ارجاع ایچون بالجمله نفوذلرینی اعماله سوق ایلمککی وظیفه دن عد ایدر. دولتک معاهداته فرط رعایتلری اولدیغی ومحافظه مسالمتی پک زیاده التزام ایلدکلی جهتله برلین قونغر سنده باشلانیلان اثرک تأمین ومحافظه سی ایچون متفقاً صرف مسامحه ایله جکلی مجر و مدر. بناء علیه طلب واقعه مزک دولتله طرفندن مساعدتکارانه تلقی ایله جکلی قویاً امید ایلمکده یز. اشته بوجزم واعتقاده مبنی نزدلرنده بولندیغکیز دولتله سائر دول ممضیه یه مراجعت ایدرز. اشبو تلغرافنامه نک بر صورتی خارجییه نظارتنه اعطایه مآذونسکیز «

اشبو مقررات وتبلیغاتدن اوچ کون صوکر ا هیأت وکلا تبدل ایدره ک کامل پاشا صدارته، ومذکور انجمنی ترکیب ایدن ذواتدن عارفی پاشا شورای دولت ریاستنه، سرور پاشا عدلیه نظارتنه، برلین سفارتنده بولونان دیکر سعید پاشا خارجییه نظارتنه، مالیه نظارتندن منفصل منیر پاشا داخلیه نظارتنه، وطوپنخانه مشیری علی صائب پاشا دخی سر عسکر لکه تعیین قلنمش وسائر نظارتلرده تبدلات اجرا ایلمشدر.

هیأت جدیده وکلانک تشکلی متعاقب صدراعظم کامل، وعارفی، وعلی صائب، ومنیر، وسرور پاشالردن مرکب اوله رق تشکل ایدن انجمن مخصوصدن تنظیم قلنان ۱۳ ایلول ۱۳۰۱ تاریخلی مضبوطده بلغارستان پرنسک دول معظمه یه یازمش اولدیغی تحریرات عمومیه ده

بلغارستانله شرقی روم ایلینک اتحادی تهید اولونورسه بلغارلرک مدافعه ایده جکی محرر بولوندیغی ویانه سفارتندن بیلدیرلمه سنه نظراً حکومت سنیه طرفندن ابتدای امرده دولتره مراجعتله شرقی روم ایلییه وهله عساکر شاهانه سوق اولونمامسی حقنده اتخاذ قلنان قرارک اصابتی تعین ایتمش اولدیغی بیان اولوندقن صوکراب عالیجه اختیار ایدیله جک طریق وتدبیر خصوصنده شرقی روم ایلیده ظهور ایدن حرکت اختلالیه نك منع سرایتی ایچون برقوه احتیاطیه عسکریه نك سریعاً جلب و جمعیه ادرنه وماکدونیا جهتلینک محافظه امنیت و آسایشنه اعتنا اولونمسی ، ودول معظمه نك باشلامش اولدقلى مخابره نك تعین ایده جک نتیجه سنه کوره شرقی روم ایلیده حقوق سلطنت سنیه نك محافظه سی ضمننده ایجاب حالک بالندا کره عرض واستیدانی ، و بین الدول جریان ایدن مخابراتک تسریع نتیجه سی ایچون تبلیغات متوالیه دن کری دورولمایه رق آله جق معلوماتک پیدرپی اشعاری خصوصنک سفرای سلطنت سنیه یه توصیه سی ، و ماکدونیا و روم ایلی شرقی جهتلرنده محافظه امن و آسایش ایچون دائره عسکریه جه تدابیر لازمه اتخاذ اولونمقده بولوندیغندن دول معظمه نك بو بابده کی وصایاسنه مقابل اجرا قلمقده اولان تدابیر عسکریه دن عندالایجاب معلومات ویرلمه سی قرارکیر اوله رق ایشه بو نقطه دن بدء ایلمشدر .

بوابده صدر جدید طرفندن تقدیم اولونوب تذکره خصوصیه ایله هیأت وکلایه تودیع قلنان مخره اوزرینه قلمه آلمان ۲۴ ایلول ۱۳۰۱ تاریخلی مجلس وکلا مضبطه سننده « شرقی روم ایلی ایچون برلین عهدنامه سیله تعین قلنان حال وهیأتک بقاسنی طلب ایتمکده دولت علیه نك حق صریحی غیر منکر ایسه ده استاتوقونک تمامیه محافظه سی ناقابل و باغار اتحادینه قارشو یونانستان و صربستانکده تدارکات و تهیات عسکریه لری معلوم بولنسنه نظراً دولت علیه جه کمال حزم و احتیاط اینه طورالنسی و اتخاذ اولنه جق خط حرکتک تعیینی لازم کله جکندن اولا بلغارستان و شرقی روم ایلی حدودی خارجنده ممالک شاهانه دن هیچ بر جهته اراضی ترک اولنمامسی ثانیاً برلین عهدنامه سی موجبجه بلغارستان ایله شرقی روم ایلینک خزینه جلیله یه ایفاسنه مکلف اولدقلى ویرکونک مقدارینه خلل و نقصان کلامسی ثالثاً عهدنامه مذکور موجبجه شرقی روم ایلی بلقانی حدودینک آسایش محلینک عودتیه برابر طرف دولت علیه دن تحکیم (احکام) قلممسی رابعاً برلین عهدینه توفیقاً بلغارستانده بولنان اسکی قلعه لرک کافه ختام مسئله ده هدم اولنمسی خامساً حل مسئله ضمننده بولنه جق چاره نك روم ایلیده همحدود اولان حکومتلرک ممالک دولت علیه قارشو تجاوزی حال

وحرگتده بولنلرینه وسیله بخش اولماسی لزومی مخطرۀ مذکورده در میان اولنوب بوماده لرك اساس اتخاذای حال وزمانك نزاكتنه موافق كورنمش اولدینی کبی پرنس علیکساندرک تحت تابعیتنده بولندیغی دولته قارشو صداقت ایده جکنه دائر بو آنه قدر ویردیگی و عدلرك خلافتی التزام ایلمسینه نظراً دولت علیه دیگر بر پرنس نصیبی آرزو ایتمک خصوصنده حقلو اولدیغندن و بوبابده روسیه دولتک دخی بر قاتدها معاوتی قزانلق مأمول بولندیغندن پرنسک تبدیلی ماده سنکده شرائط خمسیه علاوه سی حقنده کی ملاحظات سنیه محض اصابت اولسیله شرائط سته مذکورهنك اساس اتخاذای « تحت قراره آلمشدر .

مسئله مذکورهنك حدوثنی و حکومت سنیهنك دولتله واقع اولان مراجعتی اوزرینه دول سته سفراسی حکومت متبوعه لرندن آلدقلمی امره بناءً بالاجتماع بینلرنده جریان ایدن مذاکرات نتیجه سنده قلمه آلوب تبلیغ ایله دکلمی بیاننامه ده « دول فخریمه روم ایلی شرقی و باغارستان اوزرنده کی حقوق حکمرانی پادشاهی بی بالتصدیق معاهدات موجوده احکامنی تمامیلده محافظه و صلح و مسالمتک بقاسنه متفقاً قرار ویرمش اولدقلمی بیلدیرمه لریله (۱)

(۱) بیاننامه نك متنی بوجه آتیدر : « محررین امضا ایالتا ، آوستریا ، فرانسه ، آلمانیا ، روسیه ، وانکاتره سفیرلی روم ایلی شرقیده ظهور ایدن وقوعات ایله تهدید اولن ان صلح و مسالمتی محافظه و سفک دماء و قوعنی منع ایتمک و دولتله ایجاب حالی باتأمل قرار لاشدیرمه میدان ویرمک مقصدیلده آوروپا نامنه قولانیله حق لسانی لاجل التذکر عقد اجتماعه دولت متبوعه لری جانبندن دعوت ایدلمش اولدقلمی آتیده محرر بیاننامه بی بالاتفاق قرار لشدیرمشدر :

بوکره ذات شوکتسات حضرت پادشاهینک ابراز بیوردقلمی اثر جلیل حکمت و حصافتی تقدیراً و مالک اولدقلمی قوتی استعماله مراجعت ایتمک ایچون حقوق حکمرانی هابونلریله قابل تألیف هر برشی پامغه دوام بیوره جقلمی جزم و اعتقادینه بناءً برلین معاهده سنی امضا ایدن دولتله طرف اشرف حضرت پادشاهیدن ممالک شاهانه لرینک بریالنی تحریک ایدن اغتشاشاته نهایت ویرمک و اوراده انتظام و معموریتی اعانه ایلیک ایچون دلب بیوریلان معاوتی مساعدتکارانه تلقیه قرار ویرمشدر . دول مشارالیه معاهدات موجوده ایرات اوله حق هرکونه نقض علیه روم ایلی شرقیده ظهور ایدن وقوعانی بالطبع شدیداً تقبیح ایلرله دول مشارالیهم باقائلرک ایکی جهتنده قوه حکومتی اللرنده طوتانلری هیجانک حوالی متجاوزه به توسع و انتشارینی داعی اوله بیله جک هرکونه تعرض و هرکونه حرکتدن مسئول طوته جقلمدر . محافظه مسالمت دول معظمه نك متحداً . طلوبلری اولدیغندن بلغار قوه عسکریه سی رؤسائی روم ایلی شرقی حدودی اوزرنده مخاطره دن بشته برشی احداث ایده میه جک اولان تحشید عسکردن اجتنابه و مملکتجه خرابیتی مستلزم اوله جق تسلیحاتی ترک و تعطیله دعوت ایدرله . و بلغار اهالیسنک کاندولرینه عائد مسؤلیت حذره جدهماً نظر دقلمی جلب ایله برابر برکونا معاوت امیدینه دوشمیه رک نتایجی چکه جکلمی برطاقم ملاحظه سز حرکتنه تبعیت ایتمکدن تخذیر ایلرله .

۲ و ۳ تشرین اول ۱۳۰۱ نارینخرنده باب عالی یه تبلیغ اولونان ارادات سنیه ده « مذکور بیاننامه احکامی دلخواه عالی یه و منفعت دولته تمامیه موافق اولوب بلغار فسادیکنک بدایت ظهورنده بعض افکار و آرا وجهله حرکت ایدلمش یعنی در حال شرقی روم ایلی و بلغارستانه عسکر سوقی طریقنه کیدلمش اولسه ایدی شو ایشک درجه و خامتی قابل تعیین اولیان برطاقم نتایج مضره یه منتج اولسی اغلب احتمال ایکن مجرد صلح و مسالمتک تأمین بقاسی مقصدینه مستند اولان رأی سدید خلافتپناهیده ثبات بیورلسنک و ذات سامیء صدارتپناهیلرینک و وکلای سائرهنک دلخواه عالی وجهله مساعیء مسالمتکارانه دن خالی قالمالمرینک نتیجه حسنه سی اوله رق بویله بر قرار دولینک حصولدن طولایی کرک ذات درایتسمات خدیوانه لری و کرک رفقای فخام فطانت اتسام صدارتپناهیلری حقیقه تبریکه شایان بولنمش اولدقلری » بیانیه هیأت وکلایه محظوظیت سنیه تبلیغ اولونمقله برابر همان مجلس مخصوص عقیدله بو بیاننامه اوزرینه نه یاپلمق لازم کله جکنک بالاطراف تذکری امر ایدلمشدر .

اولباده مجلس وکلایه تنظیم و تقدیم قلنان ۵ تشرین اول ۱۳۰۱ تاریخلی مضبوطه ده دخی « اشبو بیاننامه دن طولایی سفرایه نه وجهله جواب ویرلمه سی لازم کله جکنه دائر بالاطراف مذاکره اولندقدنه بیانات واقعه نک سند اتخادیه هر حالده اول باول حقوق حضرت پادشاهینک و برلین عهدنامه سی احکامنک تمامیء محافظه سی و صلح و مسالمتک و آسایش مملکتک خللدن وقایه سی ایچون حکومت سنیه دول معظمه نک معاونت خیرخواهانه سنه مراجعت ایلدیکنک و پرنس علیکساندرک برلین عهدنامه سنه رعایه در حال بلغارستانه عودته دول معظمه طرفندن قطعاً دعوت ایدلمسی ایچون دولت متبوعه لری نزدنده تشبثات لازمه اجرا ایتمک طلبنده بولندیغنک و بیاننامه ده دول معظمه نک بالقانلرک ایکی جهتنده قوه حکومتی الده طوتانلری هیجانک حوالیء متجاوره یه انتشارینی داعی اوله بیله جک هر کونه حرکتدن مسؤل طوته جقلری حقنده کی فقره یه کلنجه حکومت سنیه اتخاد ایلدیکی مسلك اعتدال و مسالمتکاری ایله صلح و آسایشی درجه التزامی اثبات ایتمش اولدیغندن بویولده کی مسؤلیتی تمامیه محل عهد اولانلره براقش ایدوکنیک و صلحک بقاسه نجه کندی امضالری تحتنده بولنان عهدک محافظه احکامنده دولت علیه مرتبه سنده علاقه دار اولان دول معظمه نک تشبثلری نتیجه حسنه سی اوله رق حکومت سنیه جانبندن وسائط فعلیه یه مراجعته لزوم قالمیه جغنک و دول مشار الیه کمک بوباده وقوع بوله جق معاونتلری صربستان ایله یونانستانک کوندن کونه تراید ایتمکده

اولان تدارکات عسکریه لرینک ده ترکی انتاج ایلیه جکی قویاً مامول ایدلایکنک» بیانی تذکر
 قلمه سنه، وبالاستیدان موجبجه اراده سنیه صدور ایتمه سنه مبنی خارجیه نظارتندن دولسته
 سفراسنه مذکره عمومیه ایله اجرای تبلیغات اولونمشدر .
 بو اثناده روسیه دولتی طرفندن واقع اولان اخطار اوزرینه روم ایلی شرقیده ظهور
 ایدن مشکلاتک حقوق حکمرانی شاهانهیه موافق صورتده و برلین معاهده سی احکام
 اساسیه سی دائره سننده حل و فصلی ضمننده در سعادتده بر قونفرانس عقدی باب عالیدن دول
 معظمه یه تبلیغ اولونهرق اولباده دولترله تعاطی ایدیلن مخبرات نتیجه سننده دولت علیه
 مرخصلریله دولسته سفراسندن مرکب بر قونفرانسک اجتماعی تقرر ایتمه سیله طرف دولت
 علیه دن خارجیه ناظری سعید پاشا برنجی ، عدلیه ناظری سرور پاشا ایکنجی مرخص
 تعیین و قونفرانسده اتخاذ اولونهرق مسلك صدر اعظم کامل پاشا ایله مرخص پاشالردن
 مرکب انجمن مخصوصده تأمل و تقریر ایدیلهرک طرفلردن تنظیم قلنان مضبطه خصوصیه
 اوزرینه هیأت وکلاجه جریان ایدن مذاکرات نتیجه سننده « دولت علیه مرخصلرینک سلوک
 ایده جکاری مسلكه دائر تخطر اولنان صور مختلفه نك بری قونفرانسه پروگرامسز کیرمک
 اولوب بو صورتده مذاکره برلین معاهده سنک محافظه سی اساسی اوزرینه جریان ایتمک
 لازم کله جکندن او اساسک بالجمله مرخصلر طرفندن قبولی تقدیرنده روم ایلی شرقیده حال
 سابقک اعاده سی قراری تعاقب ایده جکی و قرار مذکورک پرنس علیکساندر طرفندن قبولی
 غیر مامول بولنسنه نظراً نتیجه سی سفک دمائی موجب اوله جنی جهتله بوسورتک اختیاری
 صواب کورنماشدر . ایکنجی صورت قونفرانسه پروگرامله کیریلهرک روسیه و آلمانیا
 و آوستریا مرخصلرینک موافق افکاری اولدینی اوزره پرنس ایله عسکرینک روم ایلی
 شرقیدن چکلمسی حقمده براخطار نامه کوندریلهرک مشار الیه ایاتی تخلیه ایدر ایتمز طرف
 دولت علیه دن بر قومیسر ارسالیله آسایشک تأسیسی اولوب او حالده پرنس قونفرانسک
 قرارینه مطاوعت ایتمز ایسه ینه عسکر ارسالی لازم کله جکندن بونک نتیجه سی شق اولک
 نتیجه سنه مساوی کورنماشدر . اوچنچی تکلیف دخی انکاتره مرخصنک فکرندن استدلال
 ایدیلان و فرانسه مرخصنک دخی التحاقی رهین احتمال بوانان صورت اولوب پرنسک
 خطاسنک عفویله بلغارستان امارتنده ابقاسی و بر دفعه یه مخصوص اولق اوزره بش سنه
 مدته روم ایلی شرقی والیلکنک دخی عهده سنه احاله سی اولوب بو ایسه روسیه و آوستریا
 و آلمانیا مرخصلریله بونلره التحاقی ملحوظ اولان ایتالیا مرخصنک خط حرکتلرینه

مغایر و یالکز ایکی دولت مرخصلرینک اتقاقیه بویله برقرارک اجرایی غیر قابل اوله جنی تذکر قلندقدن صکره حقوق سلطنت سنیه ایله برلین معاهده سی احکامنک محافظه سی ، و طرف دولت علیه دن مادی و ملکی فداکارلق اختیارینه مجبور اولنماسی و اعاده آسایشدن صکره بردها اختلال وقوعنه میدان قلامق ایچون روم ایلی شرقیده بلاقان حدودینک طرف دولت علیه دن احکامی و بو مسئله ده اتخاذ اولنه جق صورت تسویه نیک حکومت متجاوره طرفدن ممالک شاهانه یه تجاوزی حال وحرکتده بولنلمسینه وسیله بخش اولماسی اساس ماده لرینک اساس اتخاذی تنسیب ایدلمشدر .

تفصیلات آنفهدن مستبان اولدیغنه کوره قونفرانس هنوز اجتماع ایله مذاکراته شروع ایتمه دن اول دولت لک افکار و نظریاتجا اولان اختلاف محسوس اولدیغی کی او صروده انکلتزه مصلحتکنذارینک صدر اعظمه واقع اولان ملاقاتده استعمال ایله دیکی لسانده دولت نیک اولبایده کی فکر و نظرینی بسبوتون میدانه قویمشدر . مرخص مومی ایله بو ملاقاتده قونفرانسک صورت رسمیه ده کشادن اول سفرای بیننده وقوعبولان اجتماعده روسیه سفیرینک اساس مسئله حقنده اولجه کندی آرارنده بر صورت تسویه احضاری مناسب اوله جغنی درمیان ایتمه سی اوزرینه کندیسی دولت علیه مرخصنک غیابنده مذاکره یه کیریشمه یه جکنی بیلدیرمه سیله برکوبا مذاکره ایدلمکسزین سفرانک طاغلمش اولدقلرندن و روسیه دولت نیک منویاتندن بختله فکر ذاتیسنجه برلین معاهده سنندن آیرلمایه رق ، تکرار و الیلکه اعاده سی مناسب اولمایان غوریل پاشانک یرینه معاهده مذکوره موجبنه بش سنه مدتله بر والی تعیین اولونمه سی ووالیلکک ، خطاسنک عفو یله پرنس عدکساندر عهده سنه توجیه بویورلمه سی تسویه مصلحته بر چاره موافق اوله جغنی بیان ایتمش اولدیغی کامل پاشا طرفندن سلطان عبدالحمیده تقدیم ایدیلن ۱۸ تشرین اول ۱۳۰۱ تاریخلی عریضه خصوصیه دن آکلاشلمقده در .

قونفرانس ۵ تشرین ثانی ۱۸۸۹ تاریخنده طوپخاننه قصرنده اجتماع ایدهرک ، و خارجییه ناظری و دولت علیه برنجی مرخصی سعید پاشا اصولاً ریاسته انتخاب اولونه رق ، مرخص مشار ایله طرفندن برلین معاهده سی احکامیه حقوق شاهانه نیک و استاتوقونک محافظه سی لزومندن بختله فتح مذاکرات ایدلمه سی اوزرینه مرخص اول باول اساس مذاکرات اتخاذ ایدیلجک موادک تعیین و توضیحی لازم کله جکی ، و بونک تمینی ایسه ایشده اک زیاده علاقه دار اولان دولت علیه عاقد اولدیغی بیانیله حکومت سنیه جه نه یولده تکلیفده

بولونوله حق ایسه صورت موضوخته ده تعیینی اقتضا ایده جکینی بیلدیرد کلدن ، سعید پاشا حکومتدن تعلیماتنامه اخذینه تعلیق کیفیت ایده رک اجتماع آتیده قرائت ایله دیکی بیاننامه ده « بو خصوصده اوچ ملاحظه وارد اولوب برنجیسی حکومت سنیه نک هیچ بر حالد ک رک مادی و ترک معنوی فداکارلق اختیارینه مجبور اولماسی ، ایکنجیسی حکومت سنیه آسایشک اعاده سندن سوکرا اخلال انتظامی موجب اوله جق احوالک تکررینه میدان ویرلمه مک ایچون برلین معاهده سنک ایکنجی ماده سنک فقره اخیره سی حکمنجه روم ایلی شرقیده بالقان حدودلرینی تقویه ایله می ، اوچنجیسی ده اتحاد اولونه جق صورت تسویه نک بالقان حکومتلری طرفندن حکومت سنیه اراضیسنه تجاوز ایچون هیچ بر وجهله سبب تشکیل ایده جک صورتده اولماسی ماده لرینه مقصور اولدیغی ، وبو اساساتک حال و موقعک احتیاجاته وافق قونفرانس هیئاتی طرفندن ده تصدیق ایدیله جکی مأمول بولوندیغی بیلدیرل کدن سوکرا اولا پرنسک شرقی روم ایلیدن کف ید ایدوب کماکان بلغارستان امارتنده قالمق اوزره خطاسنک عفوی ، ثانیاً احوال مقررره وجهله روم ایلی شرقیه بر والی تعیینی ، ثالثاً پرنسک اولوجهله بلغارستانه عودتی مقصدینی حصوله کتیرمک اوزره وسائط مناسبه استعمالیله اقناعه تشبث اولونه سی » لزومی تکلیف قلندی .

بو تکلیف مرخصلرجه غیر کافی عدایدیله رک طرف دولت علیه دن داها واسع و قطعی بر تکلیف در میان اولونه سنه مصر لزوم کوسترله سیله (۱) حکومت سنیه جه تکلیف واقع بر درجه دهاتوسیع و توضیح ایدلمک صورتیه یکیدن قلمه آلتان بیاننامه ایرته سی اجتماعده مرخصلر من طرفندن هیأته تبلیغ اولوندی که مواد مندرجه سی :

۱ پرنس علیکساندرک عسکر یله برابر روم ایلی شرقیدن چکلمه سنی دولت علیه و دول معظمه نامنه تبلیغ ایچون باب عالی دن تحریری بر دعوتنامه بی حامللاً بر مأمور مخصوص اعزام قلنمه سی ؟

۲ مأمور مومی الیهک ذات شاهانه و دول معظمه ناملرینه اوله رق مأمورین و اهالی محلیه بی دائرة اطاعته رجوعه دعوت ایچون بر بیاننامه نشر بنه ده مأمور ایدلمه سی ؟

(۱) تکلیف مذکورده پرنس علیکساندرک نه وجهله روم ایلی شرقیدن اخراجیله والی جدیدک نه وقت ونه صورتله تعیینی وزمام اداره نک صورت تسلیمی حقنده صراحت کافیه اولمامه سنه اعتراض ، وبویکی نقطه حقنده صراحت لازمه بولونمادجه مذاکره قابل اولمایه جقنده اصرار ایستکاری مرخص پاشارک تذکره خصوصیه سندن آ کلاشلمقده در .

۳ اصول مقررہ و جہلہ بروالی تعیین و اعزامنہ قدر والی وظائفنی ایفا ایتمک و ایالتہ آسایشک اعادہ سی و نظامنامہ داخلی احکامنجہ امور ادارہ یہ متعلق وظائفک تمشیتی ایلہ اشتغال ایلمک اوزرہ شرقی روم ایلی یہ فوق العادہ بر قومیسر اعزامی ؛

۴ پرنس چکنجہ قومیسرک ادارہ مملکتی الہ آلمغہ مأمور ایلمہ سی ؛

۵ ایوم آسایشی مختل اولان روم ایلی شرقیہ متمکن اهالی ، اوامر شاہانہ یہ مطاوعت و دائرہ انقیادہ رجوع ایدنجہ ذات حضرت پادشاہی دخی صنوف تبعہ لرینک سعادت حالری حقندہ کی امال شاہانہ لری اقتضاسنجہ قومیسر طرفندن اعطا قلنہ جق راپور اوزرینہ ایالتک تأمین رفاهیتی و حسن ادارہ سی ایچون لزومی بالتجربہ ثابت اولان و نظامنامہ داخلی یہ ادخالی ممکن اولہ بیلن اصلاحاتی تدقیق ایتمک اوزرہ دولتہ لرلہ متحداً مختلط بر قومیسرون تشکیلی آرزوسندہ بولون دقلری خصوصندن عبارتدر .

بوتکلیف دخی مرخصلر بینندہ بعد المناقشہ ، فرانسه مرخصی کیفیتی دولتہ تبلیغ ایتمک ، انکلتزہ مرخصی دہ حکومتندن تعلیمات جدیدہ طلب ایلمک اوزرہ ، دیگر مرخصلر جہ اساس مذاکرہ اتخاذا ایلمشدر .

اوصردہ ظهور ایدن بروقعہ مهمہ مسئلہ نک رنکنی دکشیدردی . بدایت وقوعاتدن بری برحال ہیجان کوسترن صربستان حکومتی بلغارلرہ قارشی اعلان حرب ایلہ بلغارستان حدودینی تجاوز ایلہ دیکندن پرنس علیکساندر صربلورہ مقابلہ ایچون عسکرینی آلہ رق فلہ یی ترکہ مجبور اولدی . بووقعہ نک حدوشندن شرقی روم ایلی مسئلہ سنک سرعت حلی ایچون امیدہ دوشولدی . ۱۹ تشرین ثانی ۱۸۹۶ تاریخندہ عقد ایدیلمن آلتنجی اجتماعدہ مشارالیه سعید پاشا پرنس طرفندن مقام صدارتہ چکیلن آتی الذکر تلغرافنامہ یی ہیاتہ قرآتہ تشریح مسئلہ ایلہ دی :

« ۱۶ تشرین ثانی ۱۸۸۵ تاریخلی تلغرافنامہ سامیلرینی اخذ ایلہ دم . شہر حالک اون دردنجی کونی فلہ دن حرکت ایتدیکمک طرف سامیلرینہ اشعارینی وظیفہ دن عد ایدرم . بلغار عسکرینک بر قسمی تاریخ مذکور دن مقدم فلہ یی ترک ایلمش اولدقلری کبی قسم متباقیسی دہ ویریان امر موجبنجہ بلغارستانہ متوجہاً حرکت ایتمک اوزرہ درلر . ثناور لرینک و عسکر مک روم ایلیدن عزیمتلی تلغرافنامہ سامیلرینک وصولندن اول واقع اولدیغنی نظر دقتہ آلمہ لرینی رجا ایدرم . کیفیتک طرف اشرف حضرت پادشاہی یہ و باب عالی یہ عرض

وتبلیغیه برابر حکومت سنیه نك صربلورك تجاوزینی دفع ایله مك ، ودولتك تمامیتنه رعایت
ایتدیرمك ایچون اتخاذینی تنسیب ایده جکی تدابیردن لطفاً طرف ثناورانه مه ده معلومات اعطا
بویورمه لرینی نیاز ایلم ۱۸ تشرین ثانی ۱۸۸۵ سیلوینیچا اردوسنده دشمن قارشیسنده
علیکساندر

عین اجتماعده انکلتره مرخصی ده حکومتندن تعلیمات کافیه آلمش اولدیغنی بیان ایله مه سی
اوزرینه مذاکراته دوام وتکلیفات واقعه ماده بماده تدقیق اولونه رق بعض جهتلی تعدیله
ایدلکدن سوکرا تقرر ایدن شکل موجبنجه بر قرارنامه مسوده سی قلمه آلمه سی فرانسه
مرخصنه حواله اولوندی . ۲۵ تشرین ثانی ۱۸۸۵ تاریخنده واقع اولان یدنجی اجتماعده
بروجه آتی تنظیم ایدلمش اولان قرارنامه مسوده سی قرائت ایدلی :

« در سعادتده بولونان دول معظمه سفراسی روم ایلی شرقیده برلین معاهده سی احکامنه
توفیقاً آسایشك اعاده سی مقصدیله دولت علیه مرخصریله قونفرانس حالنده اجتماع ایده رك
مواد آتییه تی تحت قراره آلمشدر :

برنجی ماده دولت علیه مرخصری طرفندن وقوع بولان ، ودول معظمه مرخصری
جانبندن ده قبول ایدیلن تکلیف موجبنجه طرف شاهانه دن فوق العاده بر قومیسر تعیین
قلنه رق روم ایلی شرقیه اعزام اولونا جقدر . مشارالیه قومیسر والیه هائو اولان
صلاحیت واقتداری صورت موقته ده حائز اوله جق ، و ممکن اولدیغنی درجه ده روم ایلی
شرقی نظامنامه داخلی احکامنه توفیق حرکت ایله مک اوزره بالجمله اقتداری ایالتده
آسایشك اعاده ومحافظه سی خصوصنه صرف ، واداره یه هائو وظائفی تمشیت ایده جقدر .

دولت طرفندن ده مخصوصاً مأمورلر تعیین قلنه جقدر .
بومأمورلر ایفای وصایا صورتیله قومیسره معاونتده بولونه جقدر ، ونظامنامه داخلی نك
تطبیقنده مشکلات کورولدیکی صورتده قومیسر طرفندن کندیلریله استشاره ایدیه جقدر .
بوصورتله روم ایلی شرقینك امراداره سنه اشتراك ایتیه یوب رأیلری وظیفه لری صرف
استشاری اوله جقدر .

ایکنجی ماده ماده سابقه ده بحث اولونان دول معظمه مأمورلریله دولت علیه مأمورلرندن
مرکب مختلط بر قومیسرون ، قومیسر ایله برلکده عزیمت ایده جک ، و برلین معاهده سی
احکامی دائره سنده اهالی محلیه طرفندن کرك دوغروندن دوغرویه وکرك وکیللری معرفتیله

وقوع بوله جق مطالب مشروعه بی نظر اعتباره آلمق اوزره ایالتک احتیاجاتی تحقیق ایله مکلف اوله جقدر .

قومیسونک نتیجه تحقیقاتی، کذلک برلین معاهده سی احکامی دائر دسنده کندی طرفندن تنظیم قلنه جق و نیات مراحم غایات شاهانه یه توفیقاً روم ایلی شرقینک رفاه و سعادت حالی تأمینیه صالح اصلاحاتی و ایالت مذکره نك شرائط اداریه سنی احتوا ایله یه جک اولان بر لایحه یه اساس اوله جقدر .

بولایحه ممکن مرتبه مدت قلیله ظرفنده ا کمال ایدیله جک ، وقونفرانس طرفندن بعد القبول اراده سنیه یه اقتران ایتدکن صو کرا موقع اجرا یه قونوله جقدر .

اوجنجی ماده روم ایلی شرقیده انتظام و آسایشک اعاده سنی و نظامات محلیه نك صورت منتظمه ده جریانی امکانک حصولی متعاقب برلین معاهده سی احکامنجه بروالی تعیینی ایچون باب عالیدن دول معظمه یه مراجعت ایدیله جک ، وقومیسرک مأموریتی ختام بوله جقدر .

دردنجی ماده دولت علیه مرخصلری، ذات شاهانه نك مأمورین موجوده ایله اهالی محلیه بی دائرة وظائفه ارجاعه دعوت ایچون روم ایلی شرقیه بر هیأت اعزامی نیتنده بولوندرلرینی بیلدیرمش اولدقلرندن دول معظمه مرخصلری دخی بو هیأت مصلحه نك و ظائفی تسهیل مقصدیله قونفرانسک اولبایده کی مقرراتی، مأمورین و اهالی محلیه یه بیلدیرلمک اوزره ، ایالتده بولونان مأمورلرینه تبلیغه مسارعت ایده جکار ، و مأمورین مومی الیه مه حکومت متبوعه لری طرفندن ده بومالده تعلیمات اعطا قلنه جقدر .

آنجق بو آراده بلغارستان پرنسی سیلویینیچا محاربه سنده صرب اردوسنه احراز غلبه ایله صربلیلری بلغار حدودی خارجه چیقارمش ، و ثمره غالبیت اوله رق آوروپاده افکار عمومییه او طرفه میل ایتمش، اولدیغندن صرب محاربه سنک بدایتنده حاصل اولان امیدلر زائل اولمشدر . بونک نتیجه سی اولمق اوزره انکلتره حکومتی بلغارلر حقنده اوزمانه قدر کوستردیکی آثار صحابتی میدان علانیه قویهرق، مذکور مسوده نك قرائتیه دیکر مرخصلر طرفندن قبولنی متعاقب، انکلتره مرخصی آتیده کی بیاننامه ایله قرار دولی بی قبولدن استنکاف ایتمشدر . مخبرات آتیه دن مستفاد اوله جنی اوزره حقوق دولتک محافظه سی امرنده دول سائر طرفندن ده اولکی درجه ده اثر التزام کوسترله مشدر .

انکلتزه مرخصنک بیاننامه سیدر

« عثمانلی مرخصلری طرفدن قرائت اولونان مسوده اجتماعات خصوصیه مزده بدرجهیه قدر تدقیق ایدلمشدر . فکر و مطالعه مه کوره مسوده مذ کوره ایکی قسمه تفریق ایدیله بیلیرکه برنجی قسمی ، بالآخره ایضاح ایددجکم وجهله ، مقدمه و قرار ثانیده خفیف برتعديل ايله طرفدن قبول اولونه بیلیر . و بصورتله قونفرانسک مقصد اصلیبی اکمال ، وذات حضرت پادشاهینک حق حاکمیتی تأمین ایدیله بیلیر . روم ایلی شرقیده اجرانلنه جق تنظیمات آتییه تعلق ایدن ایکنجی قسمه کلنجه ، شیمدیکی حالده هیچ برصورتله قبوله اقتران ایله یه مز .

انکلتزه دولتی ، اوقبیلدن برصورت تسویه حتمنده شیمدین اعطای قراره اصلا متایل اولمایوب کړك احوال حاضرده دن مقدمکی حالک محافظه سی امرنده ، و کړك دیگر بریولده بیان مطالعه زمانی هنوز کلش اولدیغنه قانع دکدر ؛ شیمدی بولوندیغمز حاله کوره بو خصوصده برقرار قطعی اتخا ذینی غیرمناسب عد ایتدکده در . دولت علیه نک ، و امر مسالمتک منفعت حقیقیه سی ، معاهده یه واضع امضا اولان دولت لړك قبولیله ایالت مذ کورده ذات حضرت پادشاهینک نفوذی تحتنده بر اداره موقتته نک تأسیسندن عبارت اولوب « برلین معاهده سی دائره سنده » کلماتیه مقید اولماق ، و عنی زمانده جدی تحقیقاته مباشرت ایدلک اوزره مخصوص بر قومیسر اعزامی ، حال حاضرک اک مبرم الجا آتنه و حکومت سنیه نک منافع حقیقیه سیله حقوق حاکمیتنه تمامیه توافق ایدر . »

بیانات واقعه یه قارشی روسیه سفیری طرفسندن اوزون اوزون اعتراض درمیان ایدلکدن سوکرا مرخصلر ، اولبابده دولت لړندن تعلیمات جدیده اخذینه انتظاراً تعطیل مذاکرات ایله دیلر .

کړك قونفرانسک اثنای مذاکراتنده ، وکړك تعطیل مذاکراتدن سوکرا ، اساس مسئله حتمنده دولتجه برطاقم مخابرات ومذاکرات مهمه جریان ایتمش اولایغندن ، ایشک اکتساب ایله دیکی نتایجک بیانندن اول ، بونتایجی احضار ایدن مخابرات ومذاکراته نقل کلام ایدلم : قونفرانس اثناسنده دولت لړك افکار و تمایلاتجه تظاهر ایدن اختلاف و مبایت اوزرینه روسیه سفیری نزد صدارته کله رک انکلتزه و فرانسه مرخصلرندن ماعداسی روم ایلی شرقیده

حال سابقك اعاده سنه طرفدار ایسه لرده انكلتره مرخصی بورأيك تقرری حالنده صورت
 اجراسی مسئله سنی در میان ایده جکی آ کلاشلیغندن، وقونفرانسجه ویریله جک قراره پرنس
 علیکساندرک عدم مطاوعتی حالنده بونک اجرا آتی دولت علیه یه عائد برحق صریح اولدیغندن بمثله
 حکومت سنیه مرخصلری طرفندن حق اجرانک دولت علیه یه عائد بر کیفیت اولدیغی بیان قلنمه سی
 لزومنی در میان ایدوب صدراعظم طرفندن ده قونفرانس اکثریت آرا ایله مسئله یی بو حقک
 اجراسی درجه سنه قدر کوتوره جک اولور ایسه حال سابقك اعاده سی قرارینه اشتراک
 ایتمه یه جک اولان دولت لیک نفوذی پرنس ایله عونونه سنه جراً بخش اوله رق سفک دماء وقوعه
 میدان ویرلمش اوله جنی و بو حال ایسه مقصد اصلی یه توافق ایتمه یه جکی افاده ایدلمه سنه مقابل
 سفیر مومی الیه طرفندن حکومت سنیه جه حال سابقك اعاده سی عزمنده متانت کوستریلیر
 ایسه، بلغارلره تشبثات واقع لرنده فتور کلش اولمه سی جهته، عندالاقضا ولایت حدودینه
 برطابور عسکر کیرمه سیله بشقه برشی یامغه حاجت قالمق سزین بونلرک چکیله جکاری، و پرنسک ده
 حرکت عصیانیه ده دوام ایده مه یه جکی، و طرف دولت علیه دن بر قومیسر ارسالیله تأسس
 آسایش ممکن اوله جنی بیلدی رلدیگی مشارالیه جانبدن تقدیم قلنان تذکره خصوصیه ده عرض
 و ایضاح قلنمه سی اوزرینه صادر اولان اراده سنیه ده روسیه سفیرینک سالف الذکر بیاناتندن
 و مرخص پاشالرک افادات شفاهیه لرندن مستبان اولدیغنه کوره قونفرانس هیئاتی فرانسه سفیری
 بیطرف قالمق اوزره ایکی یه منقسم اولوب بونلردن انكلتره سفیرینک بیاناتی پرنسک ابقاسیله
 شرقی روم ایلی والی لکنه تعیینی و بوبابده اتحاد اولونه جق تدابیر حقنده اولجه اهالیء محلیه نك
 رأینه مراجعت ایدلمه سی اساسلرینه مستند، و روسیه و آلمانیا و آوستریا سفیرلرینک افاداتی
 انكلتره سفیرینک بیاناتنک تمامیه ضدی اوله رق شرقی روم ایلیده حال سابقك اعاده سی
 ضمننده اتحاد اولونه جق تدابیرک موقع فعله و صنعی ماده سنک برلین عهدنامه سنه توفیقاً دولت
 علیه یه حواله سی اساسنه مؤسس بولوندیغندن، و روسیه جهته تمایل کوسترلدیگی حالده ذاتاً
 انکلیزلر طرفندن تشویق ایدلمکده اولان بلغارستان پرنسینک و عونونه سنک سلاحه مقاومت
 ایله یه جکاری و بویله برحالی مشاهده ایدر ایتمز صرب و یونان و سائر حکومتات صغیره نك
 و آنلرک آرقه سنندن ده بویوک حکومتلرک اورتیه آتیه جقلری درکار اولوب علی کلا التقدیرین
 دولت علیه متعدد دشمنلرله عظیم بر محاربه قارشیسندن بولونمش اوله جغندن، بو صورتله
 نتیجه سی محمول بر محاربه یه وصولدن بای حال مجانبت قلنمه سی لابد بولوندیغی و قونفرانسده
 مرخص پاشالر طرفندن هر آن ودقیقه نظر دقت و اهمیتده طوتولمه سی لازم کن ماده محاربه یه

منجر اولمایه جق بر مسلك سالم اتخاذه اولدیغندن انکلیزر ايله روسلرک مسلك متخذلری آراسنده دولتک منافعی و مسئله نك صلحاً تسویه سنی تأمینه صالح بر مسلك اتخاذه بوندن انحراف ایدلمه سی و سائر مرخصلرک دخی اشبو مقصدک استحصالی ضمننده نقطه مطلوبه یه ایصالنه چالیشمه سی اخص آمال شاهانه اولدیغی تبلیغ قلمشدر .

قونفرانسجه مذا کرات هنوز بونقطه ده اولدیغی صروده صربستان طرفندن بلغارستانه اعلان حرب ایدلمه سی، و بلغارستان پرئسی طرفندن ذات شاهانه یه تقدیم قلنان تلغرافنامه ده صربیه حکومتک اعلان حرب ايله بلغار حدودینی تجاوز ایچون عسکرینه امر اعطایتمش اولمه سیله کندیسی ده حدودی تجاوز ایده جک صرب عسکرینه مقاومت ایچون بلغار عسکرینه امر ویردیکندن و بلغارستان اجزای متممه ممالک شاهانه دن بولوندیغندن بحثله دولت علیه نك معاونت عسکریه سی استرحام قلممه سی اوزرینه با اراده سنیه مجلس وکلا انعقاد ایدرک اجرا اولونان مذا کره نتیجه سنده « پرنسک عسکریه برابر روم ایلی شرقیدن چکیلوب بلغارستانه و دائرة اطاعته عودت ایلدیکی حالد صربیلرک حرکات تجاوزیه دن فراغت ایده جکلری اغلب مأمول اولدیغی کبی پرنس مشارالیهک دائرة اطاعته رجوعی اوزرینه صربستان حکومتی ینه حرکت حربیه دن فراغت ایتدیکی تقدیرده دولت علیه جهده ایجاب حالک اجرایی طبیعی بولوندیغندن پرنسک اشبو مراجعتنه جواباً اول امرده کندیسنک دائرة مطاوعته عودتیه برابر صربیلرک منع تجاوزاتی ضمننده اقتضای حالک دولتجه اجرا قلنه جنی یولنده باب عالیدن برتلغراف یازلمسی « تذکر و استیذان ایدلمش اولدیغی حالد اولبابده صادر اولان اراده سنیه ده « پرنس اشبو تلغرافنامه یی حسن تلقی ايله صوفیه یه عودت ایدرک عسکرینه ده کری آلسه روم ایلی شرقی اهلایسنک اطاعت ایدوب ایتیه جکلری معلوم اولمایوب عدم اطاعتلری حالنده اوزرلرینه عسکر سوقی لازم کله جکی ، و اطاعتلری فرض اولنسه صربیه عسکرینک بلغارستاندن چکلهمسی ایچون طرف دولت علیه دن وقوع بوله جق تبلیغات حکومت مشارالیهجه اصفا اولنمز ایسه صربستانه اعلان حرب ایلک ایجاب ایده جکی ، و علی کلا التقدیرین بو تشبثک حربی انتاج ایلیه جکی اغلب احتمال بولنمسیله مسئله نك عمومیتی اعتباریه قونفرانسده مذا کره سی صورتی وارد خاطر عالی اولدیغندن بورالرینک تکرار مجلسجه مذا کره سیله قرارینک عرضی « امر اولونمقدن ناشی اولبابده یکیدن اجرا قلنان مذا کره نتیجه سنده قونفرانسده شیمدی یه قدر حاصل اولان آرا پرنسه باب عالی طرفندن پازیه جق تحریرات ايله مأمور کوندریلوب عسکریه برابر بلغارستانه

عودتی اخطاردن عبارت بولونمه سنه کوره شو اخطار اوزرینه روم ایلی شرقیدن چکلمز، ویا چکیلیرده روم ایلی شرقی اهالیسی انقیاد کوسترمز ایسه اووقت نه تدبیر اتخاذاولونه جق ایسه شمدی دخی کرک پرنسک و کرک اهالینک عدم مطاوعتی حالتده او تدبیره مراجعت طبیعی بولوندیغی، و پرنس مطاوعت ایدوبده اهالی انقیاد ایله مهیه جک اولورسه بو حالده اتخاذاولونه جق تدبیر پرنسک عسکر یله روم ایلی شرقیده بولونمه سی حالتده اتخاذاولونه جق تدبیردن دها ساده و مؤثر اوله جغی، وهم پرنس وهمده اهالی مطاوعت ایتدکری تقدیرده اتحاد مسئله سنک دفعیه روم ایلی شرقیده حال سابقک اعاده سی صربستانک ده محاربه دن کفید ایله مسنی استلزام ایده جکی، و مسئله نک عمومیتی اعتبار یله قونفرانسه مذاکره سی صورتنه کلنجه، قونفرانسک مأموریتی یالکیز روم ایلی شرقی مسئله سنه منحصر اولدیغندن صربیلرک باغارستانه تجاوزی مسئله سی دخی اورایه حواله ایدیلیرسه مرخصلر بالطبع دولترندن طلب تعلیمات ایده جکلری جهتله قونفرانسک وظیفه سی توسع ایده رک یکیدن برطاقم مسائل حدوثنی مستلزم اوله جغی، و بو خصوصده ملاقات اولونان آلمانیا و فرانسه سفیرلری دخی باب عالیدن پرنسه او یولده جواب یازلمه سی شو فرصتدن استفاده ایتمک دیمک اوله رق موافق مصلحت اوله جغی بیان ایدوب ایتالیا سفیرینک ده تعلیماتی ایجابجه آلمانیا سفیرینک رأینده بولوندیغی افاده ایتدیکی بسط و ایضاح ایله قرار سابق وجهله پرنسه تلغراف یازلمه سنده اتفاق حاصل اولدیغی مجلس مذکوردن با مضبطه عرض ایدلمش، و کیفیت اراده سنیه یه ده اقتران ایده رک باب عالیدن پرنسه او یولده تلغرافنامه کشیده قانمشدرکه صورتی بوجه آتیدر:

« تلغرافنامه لری آ لندی . صرب ایله بلغارستان امارتی بیننده یکدیگره عطف اولنان تجاوز ادعا سنده هانکی طرف حقیقی اوله جغی اجرای تحقیقات ایله آ کلاشیله جق بر ماده اولوب مع مافیه صرب حکومتک طوغریدن طوغری یه امارته اعلان حربه قرار ویرمسی خلاف عهود اولمله برابر هر نه وسیله یه مستند اولورسه اولسون ذاتاً صربستانک قیامی بلغار اتحادی علیهنده بر حرکت اولمسیله حربک نتایج وخیمه سی البته بلغار اختلالنک ظهورینه سبب اولنره راجع اوله جغی درکار اولوب بو مسئله اوزرینه دول معظمه مرخصلرندن مرکب اوله رق تشکیل قلنان قونفرانسک شمدی یه قدر جریان ایدن مذاکراتی روم ایلی شرقیده استاتوقو آنته نک اعاده سی مرکزنده اولدیغندن شیمدی مسئله نک صورت سالمده حل و تسویه سنه یالکیز بر طریق اولوب اوده پرنس علیکساندرک عسکر یله برابر در حال

روم ایلی شرقیدن چکیلوب بلغارستانه عودت ایلسیدر . بو حالک حصولیله بلغارستان امارتی دائره اطاعته رجوع ایتمش اوله جغندن صربلیلرک منع حرکت تجاوزیه لری حقنده دوات علیه جه ایجاب حالک اجرا اولنه جنی بیان اولنور .

مذکور تلغرافنامه اوزرینه پرنس طرفندن کوندریلوب قونفرانسه قرائت اولونان مارالد کر تلغرافنامه دن پرنسک عسکریه برابر فلبه دن عودت ایلادیکی آکلاشیلوب بو جوابدن حادثه عصیانیه نک بلاس فک دماء تسویه سی امکانی رونما اولمش اولدیغندن ، وشو حالده دولت علیه جه اتخادی مقتضی خط حرکت قونفرانسه درمیان اولوندیغنی وجهله روم ایلی شرقیه والی تعیین اولوتجه یه قدر زمام اداره یی اله آلمق اوزره در حال بر قومیسر اعزامیله برابر صربلیلرک ده کندی یرلرینه رجعتی اسبابک استحصالندن عبارت بولوندیغندن ، بو وجهله صفت تابعیتی تصحیح ایله مسنی تقدیراً پرنسه یکیدن بر تلغرافنامه تحریریه برابر مشارالیهک انضمام موافقتیه صربستانه متارکه تکلیفی وقومیسر لکه جودت پاشانک تعیین ایله تنسیقات عسکریه خصوصنده مشارالیه معاونت ایتمک اوزره امرای عسکریه دن برینک ده ترفیق ، وقومیسرک عزیزمتندن اول اهالینک افکارینی اکلا یوب حاضر لامق ومطلوب اولان نقطه یه کتیرمک ایچون فلبه یه ایکی مأمور اعزامی مجلس وکلاجه قرارلاشدیریلهرق وبلاستیدان موجبجه اراده سنیه صدور ایده رک باب عالیدن پرنسه او یولده تلغرافنامه اسطار ، وجودت پاشانک قومیسر لکه مأموریتی اجرا قلمشدر .

فقط متعاقباً باب عالی یه تبلیغ ایدیلمن اراده سنیه ده پرنس صوفیه یه چکلمش وعسکرینی ده آلمش ایسه ده روم ایلی شرقی حکومتی الحاله هنده دولته عصیان ایدن بر قاچ کیمسه نک النده واهالی ده حال عصیانده بولونمه سنه نظراً بونلرک طرف دولت علیه دن کوندریله جک مأمورلری نصل قبول ایده جکری جای دقت اولدیغندن ، وعدم قبول حالنده بولونورلرسه عسکر سوقی لازم کله رک بوده نتیجه سی مجهول بر محاربه وقوعه کله مسیچون شمدی یه قدر دولتجه اتخاد اولونان تدابیری محووه با ایده جکنندن ، مأمورلرک اعزامندن اول حسن قبول اولونه جققرینه دائر تأمینات آلمه سی امر اولونمه سی اوزرینه کیفیت مجلس وکلاجه یکیدن موقع تذکره قونوله رق قومیسرک اعزامندن اول افکار اهالی بی آکلامق ایچون بورادن مأمور اعزامی ، ویا خود پرنس طرفندن اولجه در سعاده کوندیلوب عودت ایدن بلغار مأمورلرینک تکرار جلبیه آنلر واسطه سیله افکار اهالینک آکلاشله سی ، ویا بلغارستان

قومیسری نهاد پاشانک فلبه یه اعزامی شقلری تأمل وهر برنده بر محذور مطالعه اولونوب نهاد پاشانک مأمور مخصوص صفتنده اولمایه رق فلبه یه عزیزمتله سر آمدان اهالینک افکارینی استطلاع و بورایه اشعار ایله می ترجیح قلندیغی، و فلبه ده کی قومیسر لری واسطه سیله اجرای تحقیقات اولونمه سنک ده دوله معظمه سفرا سندن مناسبترینه توصیه سی خارجیه نظارتنه بیلدیرلدیکی نتیجه مذاکره عرض ایدلیدیکی حالدیه نهاد پاشا، کندیسنه تودیع اولونه جق مأموریتک اهمیت فوق العاده سی نسبتنده حائز امنیت کوروله مدیکندن بو خدمت مهمه نک مأمورین مسلمه دن عفت واستقامتله معروف برداته تودیغی، و کوندریله جک مأمور لریک حسن قبول اولونه جقلرینک هیچ برکونه شک و شبهه یه محل قالمق اوزره دول فخریه سفرا سی وقونسولوسلری معرفتیه امنیت قویه تحتنه آلمه سی اراده اولونمش، و بو مخبرات دورادور ایله اصرار اوقات اولوندیغی صره ده بالاده بیان قلندیغی اوزره سیلوینیچا محاربه سننده بلغارستان پرنسک صرب اردوسنه احراز غلبه ایله مسیله روم ایلی شرقی مسئله سنک رنکی و پرنسک لسانی دکشمش، و بالاخره جودت پاشانک اعزامندن ده صرف نظر قلنمشدره قونفرانسک تعطیل مذاکراتندن سوکرا جریان ایدن مخبراته کلنجه، و قوعات اخیره ایجاباتندن اولمق اوزره پرنسک عسکریله فلبه یه دونوب ینه بلغار اتحادی مقصدینه خدمت ایله می اغلب ملحوظ اولمه سنه مبنی قونفرانسجه انکلترونک غیری دولتر مرخصلریله متفقاً حاصل اولان قرارک اجرا آتیه تشبثله بر حرکت فعلیه کوسترمک و بوجهتله پرنسک فلبه یه عودتنه میدان ویرمه مک لزومندن بحثله قونفرانسک قرارینه موافقت و اتحاد مقصدندن فراغت ایتمه سی ایچون پرنس مشارالیه براخطار نامه ارسالی ضمننده دول معظمه یه مراجعت اولونمه سی، و فقط قونفرانسجه حاصل اولان مقررات حقنده دولتجه آثار فعلیه کوسترلمکیزین یالکز پرنسه براخطار نامه ارسالنک دولتره تکلیفی فائده بخش اولمایه جغندن بوبابده کی قرار دولی بی بر بیاننامه ایله اعلان ایتمک ایچون مأمور مخصوص تعیین اولونان لیب و غضبان افندیلرک ترک مخصوصله همان فلبه یه اعزام قلنمه سی، و قونفرانسک ده اجتماعه دعوتیه بوصولتک بالماذا کره تحت قراره آلمه سی، و دولت علیه قومیسرینه دولتر طرفندن ترفیق اولونه جق مأمور لریک ده تعیینی تکلیف ایدلمه سی، و قونفرانس قراری موجبجه تعیین قلنان قومیسرله دول معظمه جه ترفیق ایدیلن مأمور لریک در دست اعزام بولوندقلری بیانیه بوبابده کندی طرفندن ده ایجاب ایدنره اجرای وصایا اولونمق اوزره باب عالیدن پرنسه تلغرافنامه کشیده ایدلمه سی، و صربستان ایله بلغارستان بیننده اولان محاربه ختامه رسیده

اوله سیله برقاچ کون ایچنده بلغار اردرلرینک عودت لرینه مانع قلاماش و بلاسفاک دماء شرقی روم ایلی اداره سنک اله آلمه سی فرصتی فوت اولمق اوزره بولونمش اولدیغندن نهایت یارین کیجه یه قدر قومیسرک یوله چیقارلمه سی ، و عندالایجاب نمایش و سطوت عسکریه ارانه سنه عسا کر شاهانه نك حاضر بولونمه سی هیئت و کلاجه تنظیم و تقدیم قلنان ۱۷ تشرین ثانی ۱۳۰۱ تاریخلی مضبطه ایله استیذان قلممه سی اوزرینه صادر اولان اراره سنیه ده بروجه قرار لیب و غضبان افندیلر ترن مخصوصه اعزام ایدلمش اولدق لری کبی قومیسرک اعزامی و متعاقباً نمایش عسکرینک اجرایی ده حال و مصالحته موافق و قونفرانس قرارینه مطابق ایسه ده قومیسرک روم ایلی شرقی حدودندن ایچری کیرمه سنک بونلردن جواب موافق و رودینه تعلیقی مقرر بولوندیغندن بوبابده آلمه جق جوابه انتظار قلممه سی امر اولونمش ، و روسیه و آوستریا و آلمانیا سفیرلری طرفندن دوغروذن دوغرویه طرف شاهانه یه تقدیم اولونان مخطرده ایسه روم ایلی شرقی بلغارلرینی دائرة اطاعته ارجاع ایچون یالکز حدود اوزرنده برنمایش عسکری اجرایی حصول مقصده کافی اوله جنی تکرار قلممش ایدی . اوصره ده مشارالیه لیب افندیتمک عودتیه ویرمش اولدیغی تقریر و ایضاحاته ، و ایالتک حال حاضرینی و بلغارلرک نه کبی حرکاته مستعد اولدق لرینی مبین فلبه ده بولونان درت دولت قونسلوسیه برلکده تنظیم و امضا ایله مش اولدق لری مضبطه مؤداسنه نظراً ایالت مذکوریه عسکر سوقیه بلاسفاک دماء حال سابقک اعاده سی قابل اوله مایه جنی آ کلاشیلهرق ، بوبابده دولت لریک افکار و تمایلاتنی آ کلامق ایچون با اراده سنیه آلمانیا و روسیه سفارت لرینه اعزام قلنان کامل پاشا ، سفیرلر ایله و قوعوبولان ملاقاتنده ، بوکره تحقق ایدن حاله کوره بلغارلر اتحاد فکرنده ثابت اولوب قونفرانسک مقدمکی ظنی وجهله حدود اوزرنده یالکز برنمایش عسکری اجراییه دولت علیه قومیسرینک اداره ایالتی اله آلمه سی قابل اولمایه جنی ، و صربلیلر ایله ترک مخاصماتدن صوکره بلغارستان عسکری دخی روم ایلی شرقی عسکریه برلکده عودتله دولته اظهار عصیانه جرأت ایده جکلری قویاً ملحوظ بولوندیغندن بوبابده دول فحیمه ایله و باخصوص روسیه دولتیله بر اتفاق حاصل اولمادان اول دولت علیه نك مسلک مسالمتکارینی نتیجه سی مجهول بر محاربه طریقنه سوق ایتمک صواب اولمایه جنی افاده ایله مسی اوزرینه آنلرده بو حالی تصدیق ایله برابر « صرب و بلغار محاربه سنک ظهورنده بر نمایش عسکری اجراییه دولت علیه قومیسرینک فلبه یه کیدوب بلاسفاک دماء ایالت مذکور نك اداره سنی اله آلمه سی ممکناتدن کورونمش ایسه ده شمیدیکی حالده کندیلری

دخی روم ایلی شرقی به عسکر سوقنی توصیه ایده مهیه جککری نی ، و بناء علیه حال حاضرک دولتله بیانیه قاینه لر بیننده بالخی-ا بره برلین معاهده سی احکامی دائره سنده بر صورت تسویه بولونمه سینه انتظار اولونمه سی اسلم طریق اوله جغتی افاده ایتمشلر ، و فقط آوستریا سفیری خارجیه ناظریه واقع اولان ملاقاتنده «ا کرچه یو کون ویا خود یارین قومیسر کوندریله حک اولور ایسه بلغار عسکری حالاصرب حدودنده بولوندیغندن بلا محاربه اداره حکومت اله آله بیلوب فقط یاریندن صوکر اقبال اوله مایه جغتی «بیلدیر مشدر . فرانسه سفیری ایسه افکار ذاتیه سینه کوره احوال حاضره ایجابجه شمدی عسکر سوقنی توصیه ایده مهیه جککری ، انکلتره سفیری دخی حال حاضرده بر کونه تشبثاته حاجب اولمایوب ایکی اوج هفته یه قدر مسئله کندی کندی کنینه حل اولونه جغتی افاده ایله مشدر .

بونک اوزرینه مجلس وکلادن تنظیم اولونان ۳۰ تشرین ثانی ۱۸۸۵ تاریخلی مضبوطه تفصیلات محرره دن بجه دولتجه اولدن بری التزام اولونان مسملک احتیاط کارانه دن انحراف ایلمیه رک صدارتله آلمانیا و روسیه سفیرلری بیننده جریان ایدن مذا کره وجهله قونفرانسه جریان ایدن ، مذا کرانک ، و مرخصلر بیننده وقوعی مسئله نک بر حسن نتیجه یه ایصالنه مانع اولان اختلافاتک خلاصه درجیه دول معظمه خارجیه نظارتلرینه تبلیغ قلمق اوزره سفرای سلطنت سنییه بر نحریرات عمومیه ارسالی تحت قراره آلمش و اولباده صادر اولان اراده سنییه دهده منفعت دولته موافقتی درکار اولان بویه برقرارک اتخاذدن طولایی هیأت وکلایه محظوظیت سنییه بیانیه بوجه استیذان ایجاباتنک اجرایی امر ایلمش و آوستریا سفیرینک مضبوطه بیان اولونان افاده سی بو صره ده دخی دولتینک منفعتنه موافق برسوز سویله مش اولق فکرونیتندن عبارت وانکلتره سفیرینک بیاناتی دخی شرقی روم ایلیده کندی آرزولری وجهله اتحاد حاصل اولور فکر ونیتی اولوب آکامحل قالمسزین مسئله نک حسن نتیجه یه اقتراانی الطاف الهیه دن مستدعا بولونمش اولدینی فقره سی ده علاوه اولونمشدر . بو خصوصده سفرایه یازیلان تلغرافنامه نک فقره حکمیه سی ایسه «باب عالی بر طاقم وقوعات غیر ملحوظیه و غوائل وخیمیه سببیت ویره جکی درکار اولان تدابیر زجریه یه مراجعت ایتزدن اول محافظه مسامت ایچون آوروپا ایله برابکره صرف مساعی ایتک ، وتمامی محافظه سی کندیسنجه مطلوب اولان بر معاهده نامه یی امضا ایدن دولتله متفقاً حرکت ایلمک ، وبلغارستان وشرقی روم ایلی قوه عسکریه سنی کاملاً اداره ایتکره

اولان پرنسی دائره اطاعته رجوعه دعوت ایتک املنده اولوب مسئله نك فعلاً تسویه سی ایچون دول معظمه ایله بر آن اول بر ائتلافه وصول ایله شیمدیکی حال اغتاشاشه نهایت ویرلمسنی آرزو ایتمکده بولوندیغنی « بیلدیرلمشدر .

دولت لردن آلنان جوابلر اوزرینه صدراعظم کامل، و عارفی، و سعید، و سرور پاشا لردن مرکب انجمن و کلاجه تنظیم و تقدیم قلنان ۱۶ کانون اول ۱۳۰۱ تاریخی مضبوطه خصوصیه ده ایسه آلمانیا دولتی مسئله نك بر نتیجه یه ایصالی انکلتزه و روسیه دولتری بیننده حصول ایتلافه متوقف اولدیغنی جوابخی اعطا ایدوب، روسیه دولتی ابتدای مسئله دن بری حقوق حکمرانی شاهانه نك محافظه سنی التزام ایله دیکی کبی بوندن بویله ده دولتجه اتخا اولونه جق قراره معاونت ایده جکنی، و مع مافیه بلغارستان ایله صربستان بیننده مصالحه عقدندن اول برشی یاپیله مایه جغنی، و انکلتزه دولتی ایسه بو مسئله ده بلغارستان پرنسی ایله دوزرودن دوزرویه بر صورت تسویه بولونمه سی اسلم تدابیر اولدیغنی مطالعه سنده بولوندیغنی بیان ایله مش اولمه سی ملابس سیله حال حاضرک صورت سریه ده بر نتیجه یه اقترا نی ایچون مخبرات جاریه نك کافی اولمادیغنی تین ایله مش، و مسئله نك تسویه سی اتحادک بر صورت مناسبه ده قبولنه منحصر قالمش اولدیغندن، بو اساس اوزرینه یکی بر پروگرام استحضار یله قونفرانسک مذاکره یه دعوت اولونمه سی اقتضای حال دن کوروندیکندن، بویله بر تکلیفک بزم طرفزدن وقوعی ویا اسبابنه تشبثه دولتلردن بری طرفندن وقوعه کتیر یله سی ویا خود انکلتزه نك توصیه سی وجهله پرنس ایله دوزرودن دوزرویه بالمذاکره تسویه مصلحت اولونمه سی صورتلری تحظر و بونلرک هر برنده بر محذور ملاحظه ایدیلرک غیر رسمی وسائط مناسبه استعمال یله تصور اولونان صورت تکلیفک پرنس طرفندن دولت علیه یه عرض واستدعا ایتدیلمسی صور سائره یه ترجیح، و بو وظیفه نك بلغارستان قومیسر لکنده بولونان غضبان افندی یه حواله سی تنسیب ایدلمش اولدیغنی بیان قلندقدن صو کرا، برلین معاهده سی احکامی دائره سنده شرقی روم ایلی والیلکنک بش سنه مدته کندی عهده سنه احاله سنی مستدعی پرنس طرفندن عتبه علیا یه بر تلغراف یازدی رلدیغنی تقدیرده قونفرانسک جمعیه پرنسک اشبو استدعای اساس مذاکره اتخا اولونه رق بو صورتک قبولی ایچون بلغارستان ویرکوسنک ایفاسی، و حصه دیون تفریقی، و بر موجب معاهده بلغارستانده قالان اسکی قلع لرک هدمی، و بالقانلرک طرف دولت علیه دن احکامی شرطلری طرفزدن در میان اولونمق، و شاید اشبو شرط رابعک قبولنه اعتراض وقوع بولورسه آنت یرینه امارتله والیلک شخص واحد اوزرنده بولوندیجه

قلبه ده ایکی طاہور عسا کر شاہانہ بولون دیرلمہ سی ، و بوده قبول اولونمادیغی تقدیرده اہالیسی اسلام اولان ردوب بالقاننک شرقی روم ایلیدن ارتباطنک فک اولونمہ سی ، تکلیف ایدلمک صورتیله مسئله نک بر قرار مناسبه اقرارن ایتدیرلمہ سی درمیان قلنہ مشدر .

قرار واقع موجبنجه غضبان افندی معرفتیله اجرا اولونان تشبثات اوزرینہ شرقی روم ایلی والیلکنک بعض شرائط تحتندہ عہدہ سنہ احالہ سی پرنس طرفندن استعدا ، و مواد مذکورہ نک تفصیلاتی مذاکرہ ایچون بلغارستان امور خارجیہ مدیری جانوفده در سعادتہ اعزام قلنہ سیلہ ، اولبابده جریان ایدن مذاکرہ نتیجہ سنندہ « پرنس دولت علیہ یہ صداقت و ایالتجہ حسن خدمت ایتدکجہ برلین معاہدہ سنک اون یدنجی مادہ سیلہ تحدید اولنان ہر بش سنہ نک ختامندہ مأموریتی طوغریدن طوغری یہ طرف شاہانہ دن ابقا و فرمانی تجدید اولنمق اوزرہ شرقی روم ایلی والیلکنک عہدہ سنہ احالہ سی ، و ایالت ایلہ بلغارستان امارتنک ادارہ لری شخص واحد اوزرنده بولندکجہ مارالذکر معاہدہ نک اون بشنجی مادہ سنک فقرہ اولیسندہ معین حقوق سنہ یہ مقابل قرچہ علی ناحیہ سی اسلام قریہ لریلہ ردوب بلقانی جہتندہ واقع قرای معلومہ نک ایالت مذکورہ دن تفریقیلہ طوغریدن طوغری یہ طرف دولت علیہ دن ادارہ سی ، و ناحیہ مذکورہ ایلہ قرای مزبورہ حدودینک حکومت سنہ ایلہ پرنس طرفندن منتخب بر فن قومیسینونی معرفتیله اراضینک ایجابات طبیعیہ سنہ کورہ تعیینی ، و تفصیلاتی باب عالی ایلہ پرنس بینندہ بالموافقہ با فرمان عالی تعیین قلنمق اوزرہ ممالک شاہانہ نک اجزای متممہ سنندن اولان امارت و ایالت مذکورہ یہ خارجدن تعرض و تجاوز وقوعندہ لاجل المدافعہ پرنسک قومانداسی تحتندہ بلغار عسکریلہ برلکدہ حرکت ایچون لزومی قدر عسا کر شاہانہ سوق اولنہ جنجی کبی سائر روم ایلی ولایات شاہانہ سی اوزرینہ کذلک خارجی تجاوز وقوعندہ ایجابی قدر بلغار عسکرینک دخی عسا کر شاہانہ قوماندانلرینک امری تحتندہ اولہرق برلکدہ حرکت ایتک شرطیلہ پرنس طرفندن خدمت شاہانہ یہ عرضی ، و معاہدہ نامہ مذکورک بلغارستان و شرقی روم ایلی حقندہ اولان سائر مادہ لری کماکان باقی و مرعی الاجرا اولمق اوزرہ ایالت مذکورہ نک آسایش دائمیسنی و اورادہ کی صنوف تبعہ شاہانہ نک رفاه حال و سعادتتی تأمین ایچون ایالتک نظامنامہ داخلہ سنجه منافع دولت علیہ نظر اعتبارہ آلنہرق ایجاب حالہ و احتیاجات محلہ یہ کورہ لازم کلان تعدیلاتی درت ماہ مدتدہ اجرا و اکمال ایچون باب عالی ایلہ پرنس طرفندن تعیین اولنہ حق مأمورلردن مرکب بر قومیسینون تشکیلی »

قرار لاشدیرلشدیر . جمله اراده سنیه دن اولدیغی اوزره برغوس لیمانک ده ایالت مذکورده دن تفریقیه دولت علیه جه دوغرودن دوغرویه اداره اولونمه سنه چالشلمش ایسه ده ایالتک برغوسدن بشقه دکزه مخرجی اولمادیغندن بحثله بوکامو موافقت غیر قابل بولوندیغی بیلدیلمشدره . بوبابده مجلس وکلاجه تنظیم اولونان ۱۹ کانون ثانی ۱۳۰۱ تاریخی مضبوطه ده ایالت مذکورده جه حال سابقک تمامیه اعاده سنده کی مشکلاتدن دولای ایشک مهما امکن حسن صورتله بتیرلمه سی ضمننده شرقی روم ایلی والیلکنک پرنس علیکساندر عهده سنه احاله سی حال حاضرک ایجابات طبیعیه سنندن، واشبو صورت تسویه نک برلین معاهده سنی امضایدن دولتر طرفندن بعدالتصدیق موقع اجرایه وضعی مقتضای مصلحتدن اولدیغندن بین الطرفین تقریرایدن صورتدن بحثله سفرای سلطنت سنیه واسطه سیله دول مشار الیه مه مراجعت اولونهرق قونفرانسک اجتماعی ایچون مرخصلره تعلیمات ویرلمه سی طلب ایدلمه سی لدی الاستیدان « امارت وایالت طرفندن حکومت سنیه علیه عصیان و تجاوز و قوعی حالنده برلین عهدنامه سنک اون بشنجه ماده سنک فقره اولاسی حکمنک مرعیتی ، و کمرکر و واردات سائرده جه حکومت سنیه نک هیچ بر وجهله متضرر اولیه جنی حقنده برر فقره خصوصه درجی شریطریله قرار معروضک اجرا سنه » اراده سنیه صادر اولمه سیله موجبنه دولتره اجرای تبلیغات ایدلمشدر .

تبلیغات واقعه اوزرینه جریان ایدن مخابرات دولیه نتیجه سننده روسیه ایمپراطوری اولبابده کی صورت تسویه ده « روم ایلی شرقی والیلکنک پرنس علیکساندر عهده سنه احاله سی » تعبیری یرینه « بلغارستان پرنس نه احاله سی » دینلمه سنی تکلیف ایدوب دولترده ایمپراطور مشار الیه مماشات قیدنده کوروندکری کبی « هر بش سنه مدتک ختامنده پرنس مشار الیه طوغریدن طوغرییه طرف شاهانه دن ابقا وفرمانی تجدید اولنه جقدر » عباره سی یرینه ده ساده جه « روم ایلی شرقی ایالتی والیلکی برلین معاهده سنک اون یدنجی ماده سنه توفیقا بلغارستان پرنس نه احاله اولنه جقدر » دینلمکله اکتفا اولونمه سنی درمیان ایله مش اولمه لریله قید مذکورک بلغارستان پرنس نه عنوانه تصحیحی چاره سز بولوندیغندن ودولترک ایسته دکاری تعدیلدن مقصدلری حصول موافقت حقنی کندیلری محافظه ایله مکدن عبارت اولوب بزجه بونک ایچونده اصراره محل کوروله مدیکندن ، وروسیه دولتنک جمله تکالیفندن اولدیغی اوزره نظامنامه داخلی تعدیلاتنک دولترک تصدیقنه حواله ایدلمه سی بحثنه کلنجه ، نظامنامه مذکور اصلاً دولتر طرفندن مأمور ایدیلن مختلط بر قومیسسیون معرفتیه تنظیم قلمش

اوله سنه نظراً تعدیلاتنک دخی ینه دولتیر طرفندن تصدیقی قبوله غیر شایان بر تکلیف اولمادیغندن ، پروغرامک او وجهله تمدیلنه موافقت اولونمہ سی ، ونظامنامہ داخلی تعدیلاتی ایلریده ینه قونفرانسده تصدیق قلمق اوزره صورت معدله شمیدین تصدیق قطعی دولی آلتنه آلمق ایچون قونفرانسک اجتماعه دعوت ایدلمہ سی مجلس وکلانک ۱۹ شباط ۱۳۰۱ تاریخی مضبوطه سیله تحت قراره آلمشدر .

دیگر طرفدن بلغارستان پرئسی ده موافقت واقعه سنندن نکول ایله والیلکک بلامدت ویاخود بش سنه ده بر دوغرون دوغرویه طرف شاهانه دن عهده سنه احاله سنی استدعا وبویله اولمادقجه والیلکی قبول ایدمه یه جکئی ایما ایله مش اولدیغندن ، وبوبابده کندیلریله صورت خصوصیه ده ملاقات اولونان سفرای اجنبیه ، دولتیرندن آلدقیری تعلیمات حکمنجه صورت تسویه لایحه سنک تعدیلات اخیره وجهله قبولی خصوصنده دولتیر بیننده حاصل اولان اتحاد واتفاقدن بختله تعدیلات اخیریه قبوله پرئسی اقتناع ایچون باب عالیدن کندیسنه وصایای لازمه اجرایی خصوصنده اصرار ایتمش اولدقیرندن ، باب عالیجه پرئسه ایفای وصایا اولونمقله برابر دول معظمه طرفندن ده قرار مذکوری قبوله پرئسی مشترکاً دعوت ایچون سفرای سلطنت سنیه معرفتیه دول مشارالیه هم نزدنده تشبثات اجرا وقونفرانس ده اجتماعه دعوت ایدلمشدر .

قونفرانس ۵ نیسان ۱۸۸۶ تاریخنده صوک اجتماعی عقد ایدهرک بین الدول حصوله کلن ائتلاف دائرہ سنده تنظیم قلمش اولان آتی الذکر قرارنامه قرائت وقبول اولوندقندن صوکر اجتماعاته ختام ویرلمشدر .

قونفرانسجه تنظیم اولونان قرارنامه صورت مترجمه سیدر

«دولتیر روم ایلی شرقیه متعلق صورت تسویه نک زبرده مصرح احکامنی شمیدین قبول ایتمکده متفقدرلر . واحکام مذکورہ نک بوشکلده اوله رق درحال نشر واعلان وموقع اجرایه وضع ایدلمسنه موافقت ایلرلر .

اولا روم ایلی شرقی ایالتی والیلکی برلین معاهده سنک اون یدنجی ماده سی موجبنجه بلغارستان پرئسنه احاله بیوریله جقدر .

ثانیاً روم ایلی شرقی ایله بلغارستان امارتنک اداره سی شخص واحد عهده سنده

بولندجه معاهده مذکورہ نك اون بشنجی ماده سنك فقره اولاسنده مشروط حقوق سنیه یه مقابل قیرجه علی ناحیه سی اسلام قریه لر یله ردوب جهتنده واقع اولوب شمدی یه قدر شرقی روم ایلی ایالتی اداره سنه کچماش بولنان قرای اسلامیه ایالت مذکورہ دن بالتفریق طوغریدن طوغری یه طرف دولت علیه دن اداره اولنه جقدر . ناحیه مذکورہ ایله قرای مزبورہ نك حدودی حکومت سنیه ایله بلغارستان پرنسی طرفندن منتخوب برفن قومیسونی جانبندن اراضینک ایجابات طبیعیه سنه کوره ونقاط حاکمه عسکریه سی منافع دولت علیه یه موافق اوله جق صورتده محلنده تعیین قلنه جقدر .

ثالثاً شرقی روم ایلی ایالتنک آسایش دائمیسنی وایالت مذکورہ ده متمکن بالجمله صنوف تبعه شاهانه نك رفاه حال وسعادتی تأمین ایچون ایالتک نظامنامه داخلیمی باب عالی ایله بلغارستان پرنسی طرفندن تعیین قلنه جق مأموریندن مرکب برقومیسوننده کوزدن کچوریلهرک ایجاب حال واحتیاجات محلیه یه کوره تعدیل ایدیله جک و خزینه جلیله نك بالجمله منافی دخی نظر اعتباره آله جقدر . بو قومیسونیون درت ماه مدته اکمال مأموریت ایلیه جک و معاملاتی درسعادت قونفرانسنک تصدیقنه حواله اولنمق لازم کله جقدر . تعدیلات مذکورہ تصدیق اولننجیه دکن ایالتک احوال حاضرہ نك ایجاب ایلدیکی صور و اشکال اوزره امر اداره سی پرنسک رویت و صداقتنه محول اوله جقدر .

رابعاً برلین معاهده نامه سنک بلغارستان ایله شرقی روم ایلی حقنده اولان سائر بالجمله احکامی کماکان باقی ومرعی الاجرا اوله جقدر . دولت لر روم ایلی شرقینک بردها کوزدن کچورلمش نظامنامه داخلیمی تصدیق ایدیه یله . جکلری وقت درسعادتده اجتماع ایتمی لازم کلان برقونفرانسده اشبو سندی دخی قطعاً تصدیق ایلیه جکلردر .

اشبو سند بیک سکیز یوز سکسان التی سنه سی نیدساننک بشنجی کونی درسعادتده طوپخانہ قصر هایوننده تنظیم وامضا ایدلمشدر .

هانوتو غالوانیا وایت نلیدوف رادوویچ قالیس سعید

سرور

پرنس علیکساندر دنده قبول قطعی بی متضمن جواب ورود ایتمه سی اوزرینه روم ایلی شرقی ایالتی والیدکنک عهده سنه توجیهی حقنده اصدار قلنان امر عالی طرفنه ارسال اولونمشدر .

سیلویچا مغلوبیتی اوزرینه، دولتله جانبدن طرفین مخصوصین نزدنده اجرا قلنان تشبثات نتیجه سنده، صربلور ترك مخصوصه ایله دکتری کبی پرنس علیکساندرده آوستریا دولتی طرفندن وقوعبولان تهدیداته قارشى صربستان اراضیسندن ایلیله مکدن فراغته تعطیل مخصوصه ایچون بلغار قوماندانلرینه اوامر لازمه اعطا ائمه سیله، استاتوقو اساسی اوزرینه صلحک عقدی بین الدول تقرر ایتدی .

بلغارستانک متبوعی اولان دولت علیه طرفندن شکلاً مرخص تعیین قلنان ماجد پاشا ایله صرب مرخصی بکرشده بالاجتماع اولجه قرارلاشدیریلان بر ماده لك معاهده صلحیه ۱۹ شباط ۱۳۰۱ تاریخنه مصادف ۳ مارت ۱۸۸۶ تاریخنده طرفیندن امضا قلندی که متنی بوجه آتیدر :

« بلغارستان ایله صربستان بیننده صلح و مسالمت اعاده ایدلمشدر . بوصولته صرب و بلغار اختلافی بلغارستان مسئله سنک حل قطعیسندن اول نتیجهیه اقترا ایتمش اولدی . فقط او صروده آیریجه بر یونان مسئله سی ظهوره کله رک بر چوق وقتده آنک حلیله اوغراشیلدی .

روم ایلی شرقی وقوعاتی یونانستانه انعکاس ایدنجه ، بالقانلرده استاتوقونک بلغارلر لهنه اوله رق تغیره اوغرامه سنندن، صربستانده اولدینی کبی ، یونانستانده افکار عمومیه تهییج و « مهغالو ایده آ » فکری بنه تغاب ایتدی . او صروده موقع اقتدارده بولونان عربده جو دلی یانی قاینه سی ده بوجریانه متابعت ایله دی . صربلور ایله یونانلیرغایه ده مشترک ایسه لرده موقعلری ایجابجه مقصده وصول ایچون بشقه بشقه طریقله مراجعته مجبور ایدیلر . صربلیر دوغروندن دوغرویه همحدود اولدقلری بلغارلره هجوم ایتدکلی حالده یونانلیر ، بلغارلره آرالرنده ولت علیه نک حائل تشکیل ایله مسندن دولایی ، حدودده بولونان ولایات عثمانیهیه هجوم ایله کندیلری ایچون مال موروث حکمنده عدایتدکلی جنوبی ماکدونیا واپر قطعهلرینی ضبط و تسخیر املنه دوشدیلر . وبومقصدله تسلیحاته قیام ایله دیلر . دولتله ایسه بلقان شبه جزیره سننده یکیدن برقاریشقلق ظهورندن متحاشی و صلح و آسایشک محافظه سی فکرنده متحد بولوندقلرندن بو فکرلرینی آتنده مقیم سفیرلری واسطه سیله و مشترک نوظه ایله حکومت یونانیهیه ابلاغ ایتدیلر . یونان قاینه سی خطرات دولیه یی اصغا ائمه سیله ایکنجی بزنوظه ایله ترك تسلیحات، تکلیفنده بولوندیلر . دلی یانی بوکاده رد ایله جواب ویرمه سی اوزرینه انکلترونک تکلیفیه آلمانیا، آوستریا، ایتالیا، وانکلترونک دولتلری

بیننده برنمایش بحری اجراسی تقرر ایدرک ، سفیرلری معرفتیه یکی بر تشبث وقوعندن
صوکرادول اربعه ، و آنلری متعاقب روسیه دولتی ، یونان صولرینه سفان حربیه
ارسال ایله دیلر .

بو اثناده دلی یانی دولتره کوندردیکی نوطه ده برلین قونفره سنجه چیزیلن خط حدودی
کاملآ ایدمه دجه ادعالردن فراغت ایله مه یه جکلرینی بیان وردیف قوتلرینی جمعه قیام
ایتدی . دولت علیه ده بالمقابله حدود اوزرنده تحشیداته باشلادی .

فرانسه دولتی اخبارات ونصایحه دیگر دولتلره مشارک اولدیغی حالده تدابیر جزیه یه
اشترک ایتک ایسته مه یه رک نمایش بحری ایچون سفینه حربیه ارسالندن امتناع ایله دی .
فرانسه خارجیه ناظری فره سینه طریق دوستانه ایله یونان قاینه سنه وصایای مؤثره اجرا
ایتدیرمه سی اوزرینه ، دلی یانی دولت مشارالیه انک نصایح واقعه سنه مماشات ایده جکنی وعد
ایله دیسه ده دولترجه بو وعده مه هم وغیر کافی کوروله رک ، و حکومت یونانیه طرفندن کندیلرینه
رسمآ و صراحتاً جواب موافقت اعطاسی مقتضی عدایدیلرک ، « یونان عسا کرینک مدت
قلیله ظرفنده مقدار حضری یه تنزینی ، و تبلیغ اولونان بیساننامه تاریخندن اعتباراً بر هفته
ظرفنده بوبابده اوامر لازمه اسطار اولونه جغنه دائر تأمینات اعطاسی ، و مهل مذکورک
انقضاسنده جواب ویرلمه دیکی ویا ویریله جک جواب کافی کورولمه دیکی حالده بو معامله
ردیه دن تولد ایده جک مسئولیتک کاملآ حکومت یونانیه یه راجع اوله جنی » یولنده
طرفلردن یونان قاینه سنه بر اولتیماتوم تبلیغ قلندی . حکومت مذکوره او یولده تأمینات
اعطاسندن امتناع ایله دیکندن ۸ مایس ۱۸۸۶ تاریخنده دول معظمه سفراسی حضر بحری
قرارینی تبلیغ ایدرک ، فرانسه سفیری قونت « دوموی » ده داخل اولدیغی حالده ، آتیه یی
ترک ایله دیلر .

بوصره ده یونانلیلر بر تجربه طالع قیلندن اولمق اوزره حدود عثمانیه یی تجاوز ایتمه لر یله ،
احمدایوب پاشا قومانداسنده متحشد قوای عسکریه من طرفندن بالمقابله شدتله پوسکور تله لری
اوزرینه آرتق صوک امیدلری ده منقطع اوله رق ، دلی یانی استعفا یه مجبور اولدی . کندیسنی
استخلاف ایدن « تریقوپس » فعلاً عسکری ترخیصه ابتدار ایتمه سیله ، حضر بحری اعلانی
تاریخندن صوکرادول (۸ حزیران ۱۸۸۶) دولت علیه نک تکلیفی موجبنه دولتر طرفندن
یونانستانک آبلوقه سی رفع ، و یونان غائله سی ده بصورتله دفع ایدلدی (۱) .

نتیجه

روم ایلی شرقی حقننده پرنس علیکساندر ایله وقوعبولان ایتلاف ، بلاقید و شرط اتحاد فکرنده بولونان بلغارستان و شرقی روم ایلی اهالیسنک آمالنی تمامیه تطمین ایدمه مدیکندن ، انعقادیه برابر انحلال ایتدی . ۱۴ حزیران ۱۸۸۶ تاریخنده صوفیه ده اجتماع ایدن مجلس مبعوثانده روم ایلی شرقی مبعوثلری ده بلغارستان مبعوثلریله عین صفده اخذ موقع ایله دیلر . و پرنس علیکساندر نطق افتتاحیسنده روم ایلی شرقینک بلغارستانله اتحادینی عموم آوروپا مواجهه سنده بروجہ آتی اعلان ایتدی :

« بلغار عسکرینک احراز ایله دیکی قهرمانانه مظفریتلر ، و ملتک اقتحام ایتدیکی عظیم فدا کارلقلر ، بلغارستان حقننده عالم مدینتک محبتنی جلب ایدهرک موانع و مشکلاتنی ازاله ، و آمال و مطالب مشروعہ سنی تطمین ایچون تأثیرات مطلوبہ بی حاصل ایله دی . بناءً علیہ چوقدنبری منتظر اولان وکال جدیتله آرزو ایدیلن اتحادک حصولنی بوکون عظیم ممنونیتله مشاهده ایدیورز . بونک دلیل علنیسی ایسه وطن مشترکۀ عائد مسائلك بدار مجلس ملی عمومیسنجہ برلکده تدقیق و تذکر ایدلمه سیدر . »

آوروپا بو حاله قارشی اختیار سکوت ایتدیکی حالده روسیه دولتی شو صورتله بلغارستانده نفوذینک بالکلیه ضیاعنه قائل اوله مادی . و صوفیه ده بولونان مأمورلری واسطه سیله پرنس علیکساندر علیهنه مخالفلری تشویق و تحریک ایتدی . مخالفین طرفندن ده پرنس ، سراینده دردست ایدیلهرک حدود خارجنه چیقارلدی . و برحکومت موقتہ تشکل ایدوب علیکساندرک سقوطی اعلان اولوندی . فقط اکثریت اهالی بو حرکتہ مخالف اولدیغندن واقع اولان قیامه قارشی متعاقباً دیگر برقیام وجوده کله رک ، پرنس صوفیه ده دعوت ایدلدی . علیکساندر بلغارستانه عودت ایدنجہ ، روسیه ایمپراطورینک ضایع ایله دیکی توجهنک اعاده سی ایچون برتلغرافنامه تقدیمیه کندیسنه مراجعت و عرض صداقت و مطاوعت ایدهرک اوامری دائره سنده اجرای حکومت ایله یه جکنه دائر اعطای تأمینات ایتدیکی حالده ایمپراطور بو تأمیناتی عدم اصغا ایله ، « تلغرافنامه فخیانه لرینی آلام . بلغارستانه عودتکزک مملکت ایچون حاصل ایدہ جکی نتایج وخیمہ بی مشاهده ایله دیکمدن بو حالی تصویب ایدہ مم . سز بلغارستانده قالدقہ ، مملکتک اوغرایه جنی احوال مؤلمہ یه هر درلومداخله دن اجتناب ایله یه جکم . آرتق یاباجغکز شینک تقدیری ذات فخیانه کزه عائددر . بنده ، پدر محترمک خاطرہ مبعجله سنک ، و روسیه نک

منافعنک ، و شرقک آسایشنک امر ایتدیکی شئیئک تعیننی حقنی محافظه ایدرم ، یولنده آغیر برتلغرافنامه یازدی .

برنوع اولتیماتوم دیمک اولان بو تلغرافنامه اوزرینه پرنس علیکساندر استعفایه مجبور اولدی . « مملکتک استقلال و حریت و حقوقی محفوظ قاله جغنه ، امور داخلیه مزه کیمسه نك مداخله ایتمه یه جکنه دائر حشمتلو روسیه ایمپراطوری حضر تیرندن تأمینات آلهرق بلغارستان تختندن فراغت ایله دیکمی سوکیلی ملتیه بیان ایدرم » عباره سنی حاوی براستعفا نامه تحریر و امضا ایله بلغارستانی صورت دائمه ده ترک ایله دی (۱) . روم ایلی شرقی مسئله سی دخی ختامه اقتران و بالآخره بلغارستان مسئله سی شکنه انقلاب ایتدی .

روم ایلی شرقی مسئله سی اثناسنده سلطان عبدالحمید طرفندن باب عالی یه رسمی و خصوصی اولهرق برطاقم اراده و مخطرله لر تبلیغ ایدلمش اولدیغنی کی صدراعظم کامل پاشا طرفندن ده برچوق مخطرله و عریضه لر تقدیم اولونمش ، و بونلر کندیلرینک اساس فکر و نظرینی موضح بولونمش اولدیغندن ، ایچرنده حائز اهمیت کورولن برقاچ عددی بومبیحشه ذیل اولهرق عیناً درج ایدلی :

ذیل

۱

سلطان عبدالحمید طرفنده صدارت تبلیغ اولونانه اراده فخر صیدر

شرقی روم ایلی مسئله سنک بدایت ظهورندن برو دولت علیه یه قارشو دائماً ابراز آثار رقابتله کندو خصوصی پولتیقه لرینک ترویجی ضمننده برر مسلك مخالف اتخاذا ایدرک ایشک کتدکجه کسب اهمیت و جسامت ایلمسینه سبب اولان انکلتره و روسیه دولت لرینک مسلك متخذلری معلوم عالی اولمغله ایضا حدن صرف نظر اولنوب شو قدرکه حادثه معلومه اساساً وفرعاً انکلیز لک اثر تشویق و ترغیبی اولدیغنده الیوم اصلا شک و اشتباه اوله مامقله برابر بدایت وقوع اتدن برو انکلیز لک ارباب اختلال ایله بونلرک ریاستنی قبول ایتمش اولان بلغارستان پرنسینی و مطالب واقع لرینی مدافعه و ترویج ایدرک روسیه یه قارشو بلغارلری دائره صحابتکار یسنه

(۱) « ماق شویله » نک (شرق مسئله سی) .

المق و بوضورتله بونلری روسیه دولتک حمایه معنویه سندن و متبوع حقیقیلری اولان سلطنت سنیه نك نفوذ و حکم سیاسی سندن قطع علاقه ایتدیرمک یولنه کیدرک قونفرانس مقدراتی و ایشده طوغرودن طوغرویه علاقه دار اولان دولت علیه ایله دول شمالیه دن بعضیلرینک کافه تشبثات و مساعیسنی کائن لم یکن حکمنده برافغه موفق اولمش و روسیه دولتی ایسه بدایت امرده کندو نفوذ معنوی و سیاسی سندن چیقهرق انکلیرلره تبعیت ایدن بلغارلری و خصوصیه بلغارستان پرنسینی نوعما تأدیپ و تربیه مقصدیله در حال حرکات واقعه لرینی تقییح و پرنسی روسیه عسکری سلکندن طرد و اخراج ایدرک بو خصوصده کی منافی حکومت سنیه نك منافعیله تماماً تطابق و توافق ایلش اولمغله حال سابقک اعاده سی و عهد موجوده نك محافظه احکامی ضمننده حقوق سلطنت سنیه یی کاملاً تصدیق ایتدکن ماعدا حقوق مقدسه مبحوثه نك خلدن وقایه سی امرنده پولتیقه سنی دولت علیه پولتیقه سنه تطبیق ایتمش و اوستریا و المانیا و ایتالیا دولتلری دخی اشبو دائره اتحاد داخلنده حرکتله بوندن انحراف ایلاملری اسبابنک تأمین و استکمالنه بذل مقدور اولمش اولدینی حالدله بالاده بیان قلندیغی وجهله انکلیرلرک تشبثات مضره واقعه لری اثری اوله رق بش دولته رغماً انکلیر پولتیقه سی کسب موفقیت ایلش و بلغارلرک صربلرله محاربه لرنده نائل اولدق لری موفقیات دخی احوال سیاسی موجوده یه انضمام ایدرک نهایت الامر شمیدیکی حالدله استطلاعات موثوقه واقعه یه کوره دولتلری بلغارلرک محسنات موقعیه حاضره لرینه نظر بیقیدی ایله باقه مامق راده لرینه ایصال ایتشدیر . روسیه لولرک بلغارلرک حرکات واقعه سنی تقییح ایدرک مطالب استیلاجویانه لرینی ترویج ایتاملری محضاً انکلیر کبی بر اجنبی وزمان حاضرده روسیه دولتک دشمن و رقیبی اولان بر دولتک نصح و پندیه حرکت ایتدکلرندن منبعث اولوب اساساً بلغارلرک کسب قوت و نفوذ و توسیع اراضی ایتلمی روسیه دولتک دخی منوی ضمیرینه موافق بولمقله و احوال حاضره یه و بلغارلرک موفقیات اخیره لرینه روسیه دولتی اولجه اتحاد ایلش اولدینی مسلکده دوامی کندوسیچون هیچ بر فائده معنویه و سیاسی انتاج ایده میه جکی ملاحظه سیله مسلک قدیمندن کلیاً انحراف ایده مامکه برابر بلغارلرک ترویج مطالبی خصوصنده طوغرودن طوغرویه اجرای تشبثات ایتیه رک ایشی انکلیرلرک مساعی صحابتکار بسنه براغوب بونلرک مدعیات و مطالبی بلکه جزوی بعض تعدیلات ایله مدافعه و قبول یولنه کیده جکی ا کلاشلمقده و لوندرده المانیا سفیری قونت هاچفلدک لورد سالسبوری ایله وقوع بولمقده اولان مذاکراتندن استدلال قلندیغنه کوره انکلتره دولتیله و بونک رأی و افکارینه موافق

بر صورت تسویه مصالحت تحری ایلمکده اولدیغنه نظراً المانیا دولتی دخی انکلیز لره
 اویوشمق یولنه سلوک ایلدیکی فهم ایلمکده در .
 اشته خصوصات واستطلاعات مشروحه دن دخی مستبان اوله جنی وجهله مسئله بررنک
 دیگر المغه بدأ ایلمک ملابسہ سیله دها زیادہ کسب اهمیت و نزاکت ایتیش و بوبابده مجلس
 و کلاجه جریان ایدہ جک مباحثات و مذاکرات اونسبتده تعمیق ایلمک لازم کله جکی امر
 طبیعی بولنش اولمغله مجرد اثنای مذاکراتده ایضاح احواله و توسع معلوماته مدار اولمق
 اوزره استطلاعات واقعہ نک بروجه مشروح سرد و تفصیلنه مبادرت بیورلمش اولمغله اولبابده .

ذیل

۲

سلطانہ عبدالحمید طرفینہ امداد طریقہ یازدی بیابوب صدر اعظم و خارجه ناظری
 یاشارہ تبلیغ اولونانہ مخطرہ در

مسئلہ حاضرہ یعنی کرک روم ایلی و کرک یونانستان مسئلہ سی کیتدکجه کسب اهمیت
 ایدوب بونلری دولت علیہ نک حقنہ خیرلو اوله برق دفع ایتک ایچون تشبث وقوعی
 کورلدیکندن فوق العاده تشکر و دعا بیورلمقده در .

۲۶ جمادی الآخرہ ۱۳۰۳ و ۲۰ مارت ۱۳۰۲ تاریخلو تذکرہ صدارتدن آ کلاشلدیغنه
 کورہ قونفرانسک همان اجتماعیلہ پرنس قبول ایتسون ایتسون قرار اخیر وجهله پروتقولاک
 تحت تصدیقه آلمسی موافقدر . بوبابده بعض اخطارات عالیہ یه لزوم کورونمشدر . شویله که:
 دولتلرک مجتمعا تکلیفلری اوزرینہ همان قونفرانس اجتماع ایدہ رک (پترسبورغ سفارت
 سنیه سنندن باش کتابتہ کلن بر تلغراف اوزرینہ دعوت بیورلمش ، و بلا افاتہ وقت برلین
 سفارت سنیه سنندن کلوب پرنس بسمارک افاداتی حقنہ اولان تلغراف دخی اشبو خصوصی
 تأیید ایله مشدر) .

بالادہ کی تذکرہ مندرجاتندن دخی آ کلاشلدیغنی وجهله پرنس قراری قبول ایتدیکی
 حالده پرنس ایله دولت علیہ بیننده یاپیلان صورت تسویہ بی دخی کآن لم یکن حکمنده
 براقه جغندن ردوب جهتنده دولت علیہ عسکریلہ بلغار مصادمه سی خاطرہ کلیور .

شو مسئله یی دولت علیه کندیسنه منفعتلی صورتده تسویه ایچون هر درلو وسائطه مراجعت ایتکی مشروع کورمکده ایم . شا کر پاشا تلغرافنده روسیه پرنس-نک عزلنه دائر اولان مطالعه سی فوق العاده دقته شایان کورنمکه برابر انکلترونک دخی بونک عکسی اوله رق پرنسه معاوتی ضدیتی سببیه دولت علیه نک شو مشکلاته دوچار اولدینی تمامیه آشکار اولمدر . بزمده بویکی طرفدن بر طرفی التزام ایله مسئله یی تسویه ایتک زمانی کلدیکی ، چونکه ایکسینک اورته سنده ایش کورمک قابل اوله میه جغندن درلو درلو مشکلاته وایلروده پک بیوک تهله کله تصادف اولنه جنی دخی بدیداردر . بناء علیه روسیه وانکلترون هانکی جهتی جدی بر صورتده طوتورق مسئله یی بر طرف ایتک لازمدر . شمدی یه قدر بتون انکلترونک نصیحتلریله حرکت اولدینی ، (مثلا طوغریدن طوغری یه پرنس علیکساندر ایله سویلشمک کی) وقونفرانسده ویریلان قرارلره قارشو حرکتی ، و پرنس علیکساندرک وبلغارستانک اتحادی حقنده کی بیان اولنان موادی ، و شمدی ده طوشانه قاچ تازی یه قوو یولو پولتیقه سنه باقیلورایسه قرالیچه یی ممنون ایتک ایچون بلغاریه نک اتحادینی وبلکه بسبتون استقلالنی وشو صورتله ادرنه ودرسه عادتتی تهیدد التنه المق ، وشو حالده روسیه دولتنی بالضروره بلغارستانی عسکرله اشغال ایتکه مجبور ایتسی ، وارتنق صکره نهایتی کسدریله مز تهله کله کورلدیکندن شا کر پاشادن کلان تلغراف اوزرینه برچاره خاطره کلدیکندن پاشالرجه مناسب اولوب اولدینی صدراعظم حضرتلری تحت ریاستنده خفیا مذاکره بیورملرینی حواله ایدرم . شویله که تلغرافدن کلاشیله جغنه کوره روسیه ایمپراطورینک پنچشنبه کونی قریمه عزیمت ایده جکی جهته یوندن بالاستفاده اوتهدن بری امثالی اولدینی کی برهیئت سفارتک برنامه مخصوصله کوندرلمسی ایچون حاضرلمسی ، بوندن روسیه سفریله بلغارستان مشکلاتنک اورته دن قالدیرلمسی ، و روسیه دولتیه دولت علیه بیننده برائتلاف حصولنی فعله کتورمک ایچون وشو مسئله یی بای حال بتورمک اهم والزم اولدینی ، و بوکاده چاره عناد واصرارده بولنان و ایمپراطور حضرتلرینه قارشو بالضروره مناسب سزلیکرده بولنان پرنسک ایمپراطور حضرتلرندن عفوی ایچون هیئت سفارت واپور مخصوصله وارنه یه کوندریله رک واورادن پرنس علیکساندر هیئت سفارتله کمی یه النهرق ایمپراطور حضرتلرینه مأمورمز اولان سفارتله برابر مقام ترضیه ده ملاقات وقوعندن صکره توسط مزله شو مسئله تسویه ایدیلهرک اورادن دخی درسه عادتیه عودت وبوراجه ملاقات اولنه رق والیلکنک اجراسیله مأموریتنه کوندرلمسی ، واکر پرنس ایلروده روسیه دولتیه دولت علیه یه قارشو

مناسبتسز احوالده بولندیخی ا کلاشیله جق اولور ایسه بینهماده یاپیله جق مقاوله اوزرینه پرنسک برچاره سنه باقیله جغنگ حکومتین بیننده تحت تأمینه النهرق مسئله نك اورتهدن قالدیرلمسی ممکناتدن اوله جنی ظن و تخمین اولنیور. ایشته بوبابده روسیه سفیر یله پرنس علكساندره اشبو تشبته موافقت ایدوب ایتیه جکی و کوندریلن واپورله روسیه ایمپراطوری نزدینه واورادن بورایه ومؤخرأ مأموریتنه کیدوب کیتیمیه جکی وقت ضایع ایتیمکسزین محرمانه صورتده سؤال ایدیلوب اقتضاسی اجرا قلمق ، اکر بیان اولنان صورت مناسب کورلمدیکی حالده تلغرافده ایکی رقمیله کوستریلن جمله نك پرنسه بیلدیر یله رک ، ایشک وخیم وتهلسکه لی اولدیغنگ واصرارنده ثبات ایلدیکی صورتده حقنده درجه سز مضر اوله جغنگ مناسب بر صورتده پرنسه تفهیم قلنهرق ، اصرارندن واز کچیرلمسی چاره لرینک بولنمسی ، والحاصل بوبابده اولان مطالعات ومذاکراتک عرضی

ذیل

۳

صدر اعظم لامل یاتابه صورت مخصوصه تبلیغ اولونانه مخطرہ منبدر

بلغار مسئله سی شمدی یه قدر تسویه اولنه بیلور ایدی . فقط هر نه دن ایسه انکلتزه نك اصراری اوزرینه سورنجه ده قالدی . شمدی محاکمه ایدلم : مصر مسئله سنده انکلیرلر مصری تخلیه ایدرز فقط ایلروده مشترکاً عسکر سوق ایدلم مشترکاً شونی یاپالم بونی یاپالم دیور یعنی دولتک حقوقنه اشتراک ایتمک ایستیور . وبویله جه بالاخره بلسکده بتون بتون استیلا ایتمک ایستیور . فرانسه ایسه خیر استاتوقو محافظه اولنمیدر ، فرمانلرک احکامی اجرا اولنمیدر . انکلیر عسکرینی بتون بتون چکوب مصر حال قدیمه ارجاع اولنمیدر دیور . انکلیر ایسه خیر سلانیکه قدر بر بلغارستان تشکیل اولنسون دیور . و برده آرنادلق بکلکی احداث ایتمک ایستیور . آوستریا سلانیکه ایلرومک ایستیور . ایتالیا برلین معاهده سیله بکا برشی ویرلمدی دیهرک باربار باغریور . وانکلیرک آرقه سنی طولاشمسی ومصوعه عسکر سوقی بو قدر مصرف اختیاری البته بر خیر مقصدله دکدر .

شمدی یه قدر دولتک طوتدیخی پولتیقه لیت لعل ایله وقت کچورمک اولدی . فقط شمدی ایش میدانده . فوتیادیسک تلغرافی و وایتک افاده سی . دونما دیمک بزه ایستدکری

کبی هر شیئی یاپدیرمق ایچوندر . حالبوکه شمدی یه قدر باب عالینک طوتدینغی مسلیکن انکلیرلر وسائر متفقلری امین اولدقلرندن وشمدی یه قدر مخالفت ایدن افندمز اولدیغندن دیمک بو نمایش بالخاصه افندمزی تهیدد ایچون اولیور . شو حاللره نظراً عییا انکلیرلر طرفنی التزامده نه منفعت واردر ؟ بلغارلر بر یاندن بوراده چیزمه اصمارله دیلر باروت وخرطوج اصمارله دیلر مرورینه رخصت ویرلدی . بونلر دائماً تدارکاتده بولنیورلر . بوکیمه قارشودر ؟ بوجهتلری افندمز آ کلایه میورلر . بویله شیلرله برابر انکلیرلر طرفنده دولتجه خیرمی واردر ؟ بوراسنی الله عشقنه بیان ایتسونلر . وبو حاللره قارشو نه یاپلمق لازمدر بورالینک بالاطراف ایضاحی فرمان بیورلمشدر .

ذیل

۴

کامل یاشا طرفنره تقریم اولونان عریضه خصوصیه در

بلغارستان مسئله اختلالیه سی حقنده اوروپاچه افکارونیات نه مرکزده بولندیغنه دا بعض حسیات ومطالعاتی حاوی دریسه پاشا (۱) طرفندن عتبه علیایه عرض اولنوب ترجمه لریله برابر ارسال قلنان ایکی قطعه فرانسزجه ورقه نك بالاطراف تدقیق ومطالعه سی ولازم کلان معلوماتک استحصالیه کیفیتک حضور عالی یه عرضی امر وفرمان هایون خلافتپناهی ایجاب جلیندن اولدیغنی مبلغ ۲۹ دی الحیجه ۱۳۰۲ تاریخی تذکره خصوصیه علیه لری مطالعه و ذکر اولنان ورقه لرك مندرجاتی تدقیق اولندی بونلرک محتویاتی شمدی یه قدر استحصال اولنان معلومات وحاصل اولان حسیات شناوری یه دخی موافق اولوب فقط پاشای مشارالیه بیانی وجهله اوروپاچه حواله ایتمکسزین کندو کندومزه تسویه مصالحته چالشلمسی وبومقصدده مبنی پرنس علیکساندری بلغارستان امارتنده بالابقا شرقی روم ایلی والیکنک دخی عهده سنه حواله سیله برلین معاهده سی احکامنجه دولت علیه یه قارشو اولان موقع ووظائفی محافظه ایلسنک کندوسنه تکلیف ایدلمسی وبلقان حکومتلرینک موازنه سنی تشکیل صورتنده شرقی روم ایلی نك اهالیسی اسلام اولان بعض ناحیه لرینک ادرنه ویا سلانیک ولایتنه الحاقنک طلب اولنسی مطالعه سنه کلنجه پرنس ایله ، روم ایلی شرقی مسئله سنی (۱) بو دریسه پاشا فرانسز جنراللرندن اولوب خدمت دولته آلنهرق ، معیت سنیه دهه وپولتیقه ایشلرنده استخدام قلنمش ، ومشیریت رتبه سنه قدر ترفیع ایدلمش ایدی .

دولتلی قارشیدیرمیهرق، تعدیل و تسویه ایتمک برلین معاهده سنی کندو کندومزه فسح
ایتمک دیمک اولوب حالبوکه برلین معاهده سنک حکمی برطرف ایدلیدی تقدیرده بونک
یرینه ایاستفانوس معاهده سی قائم اوله جغندن ایلروده روسیه لولرک آرزوسی اولان بیوک
بلغارستانک تشکلنه میدان ویرلمش اوله جنی کبی بروجه محرر یالکیز بلغارلرک تسکیننه مدار
اوله جق اوله برصورت تسویه حصول پذیر اولسه بیله صربستان ایله یونانستانک آمالنه مغایر
اوله رق بونلرک واقع اوله جق حرکات تجاوزیه لرینی منع ایچون مطمح نظرلری اولان یرلردن
اراضی اعطاسیله کندولرینی ارضا ویاخود سلاح ایله مقابله ایتمک لازم کله جکی وبوصورتله
بریده دفعنه چالشیلان مشکلاتک اوتوده دهها شدتلیسنه تصادف ایدلمش اوله جنی درکار
وقالدیکه مسئله نک صورت تسویه سی دولتله مذاکره اولندقجه صرب ایله یونانستان ایشک
نتیجه سنه ترقب ایدرلر ایسه ده دولتله مداخله سی برطرف ایدیلرک بلغارستان پرنسیله
طوغرودن طوغرویه تسویه مسئله ضمننده محاربه یه شروع ایدلمش اولسه بو تشبثک
نتیجه سنده برلین معاهده سی خارجنده بلغارلرک نائل مساعده سنیه اوله بیله جکلری فکرینه
بناء نتیجه حاله بیله انتظار ایتمیه رک حدود خاقانی بی تجاوزه تصدی ایتملی احتمالدن بعید
اولمیوب بو حالده ایسه دولتله دخی بزه تحمیل مسؤلیت ایدرک کندو منفعتلرینک ایجاباتنه
کوره حرکت ایلیه جکلری وارد افکاردر بناء علیه بو مسئله محاربه یی انتاج ایلش اولسه
حصول مظفریتده بلغارستان ایله شرقی روم ایلمینک امتیاز ومختاریتنی کیرویه المق و صرب ایله
یونانستانک یرلرینی ضبط ایله کافی السابق ممالک شاهانه یه الحاق ایتمک قابل اوله میوب
محاربه ده اختیار اولنه جق فدا کارلق نتیجه سز قاله جنی امثال سابقه سیله مستدل اولمغله
مشکلات حاضرهنک صورت مصلحانه ده حکیمانه تسویه سی ده از یاده موافق منفعت اوله جغندن
بو مقصدک حصولی ایچون ممکن اولدینی قدر دولتله بلغارستان ایله صرب ویونانستان
اوزرنده جاری اولان نفوذلرندن استفاده اولنسی و فقط ایش سورنجمه ده قالدقجه تهلکه
محاربه یه معروض برحاله بولنیله جنی جهتله مشکلاتک اندفاعنه مدار اوله جق قرار دولینک
تعجیلی مقتضی اولوب بو ایسه سایه موفقیتوایه حضرت خلافتپناهیده اجرادن کیروطورلمدینی
کی ینه کون بکون مسئله نک کسب ایده جکی رنکه کوره تدابیر لازمه اتخادی وتهیئات
حربییه دوام اولنسی موافق حکمت حکومت اوله جغنک عتبه سنیه جناب ملوکانه یه
عرضی متسنادر ذکر اولنان ورقه لر ترجمه لرله برابر لفاً اعاده اولنشدنر افندم .

فی سلخ ذی الحجه ۱۳۰۲ و فی ۲۸ ایلول ۱۳۰۱

ذیل

۵

کامل یا تا طرفندہ تقریم اولوناه مخره در

روم ایلی شرق مسئله سنک هر حالنده شرفسناخ اولان خواطر الهام مظاهر حضرت
 خلافت پناهینک ذرات حقایق بیناتی حقا که یکدیگرینه فائق وحل مشکلات ومعضلات
 ایچون تدابیر صائبه اتخاذینه محور لایق اولدینی مثللو دون اخشام حضور شوکت موفور
 شهر یاریده تلقیسیله شرفیاب اولدینغ ارادات سنیه هروجهله حکم سیاسییه موافق اولسیله
 صور اجرائیه سی سجده شکرانده لدی المطالمعه مادامکه بومسئله نیک تسویه سی خصوصنده
 قونفرانسجه دولتر بیننده حصول اتحاد قابل اوله مامشدر صرب عسکرینک بلغارستانه
 تجاوزی اوزرینه پرنس علیکساندرک باب عالی یه جواباً یازدینی تلغرافنامه ده عسکر یله برابر
 شرقی روم ایلی ایالتندن چکلدیکنی بیان ایله کندوسنی دائره اطاعتمده کوسترمش ایکن ایالت
 مذکورده حال سابقک اعاده سی حقنده دولتر بیننده نمایان اولان اتفاقسزلغه شممدی
 انضمام ایدن غرور غالبیت ترک مخاصماندن صکره پرنسک ینه دونوب بلغار اتحادی مقصدینه
 خدمت ایلمسنه جراً تجش اوله جنی احوال دن اولسیله بوجسارنی منع ایچون لایح خاطر عالی
 اولدینی اوزره چونکه پرنسک باب عالی یه اولان جواب اخیرنده فلبه یه قومیسر ارسالی
 خصوصنه اعتراض یوللو ملاحظه بیانیله روم ایلی شرقیدن هنوز کف ید ایتدیکی کلاشلمش
 اولدیغندن روسیه المانیا و اوستریا دولتری سفراسیله بالندا کره دولت علیه ایله دول مشارالیه
 ایمپراطور لری طرفندن برنسه برر اخطار نامه ارسالیله ایالت مذکورده دن کف ید ایلمسنک
 کندوسنه تکلیف اولنسی موافق حکمت اولوب اگرچه روسیه ایمپراطوری پرنسندن
 مغرب اولدینی جهتله کندوسیله مخابریه تنزل ایتیه رک خارجیه نظارتی و یا خود در سعادت
 سفارتی واسطه سیله اجرای تبلیغات ایتسی و دیگر ایکی دولتک دخی اکا کوره معامله
 ایملری ملحوظ ایسه ده هروجهله اولسه ایله بر اخطارک پرنسه تاثیر ایلیه جکی بدیهی
 وشوقدرکه اتحاد فکرنندن یالکز پرنسک نکول ایتسی غیر کافی اولدیغندن بلغارلرک دخی
 اوفکردن واز کپیرلسی ایچون مقدمه روم ایلی شرقیده اتحاد قراری نوجهله اهالی یه اعلان
 اولنش ایسه بوکرده دولترک دعوتی اوزرینه اتحاد تشبثاته اشتراک کن کندوسنک فراغت

ایلدیکنک پرنس طرفندن ینه اهالی به اعلان اولنسی لزومنه بنساء بوصورتک اجراسنی پرنسه تکلیف ایله عدم اجراسی حالنده کندوسنک امارتدن عزلی مقرر اولدیغنک دخی مشارالیه اخطاری لازم کله جکی وبوبابده اوچ دولتک اتقاقی حاصل اولدیغی تقدیرده کپرو قلان اوچ دولت قونفرانسه اولان مرخصلرینک مأموریتلرینه نهایت ویرملری وپرنس علیکس اندرک محتمل اولان تعندی اوزرینه عزلیله یرینه تعیین اولنه جق دیگر برپرنسک مأموریتنی تصدیقه تعلل ایلمری ملحوظ ایسه ده بوکا محل بر اقامق ایچون صورت متصوره نک اجراسی طلبی یالکز روسیه و اوستریا و المانییا دولتلرینه حصر ایلمیوب صورت محرره دول ثلثه مذکوره ایله میانده بالمذاکره قرارلشدیرلقدن صکره بوجه معروض پرنسه اخطارنامه ارسالی خصوصی دول معظمه نک جمله سندن طلب اولنوب بو حالده ای تالیادولتی لاجرم و فرانسه حکومتی اغلب احتمال اوله رق دیگر دولتلرک مسدکنه اتباع ایده جکلری کبی انکلتره دولتی دخی دیگر دولتلرک اتقاقی کوردیکی حالده کندوسنه استناد ایدن پرنسه نصیحتدن عبارت اولان براخطارک ایفاسنی دریغ ایله مشارالیهک عزلی و وقوعه کتورمکدن ایسه دولت مشارالیهانک دخی دیگر دولتله التحاق ایدرک پرنسه اخطارنامه کوندرمی احتمالدن بعید کورنمز وبالفرض دولت مشارالیه ودرجه ثانیه ده فرانسه حکومتی اولبابده اوله جق تشبیه التحاق ایتماش اولسه لر بیله دولت علیه بومسئله ده دیگر درت دولتک رأی و اتقاقریله عمل و حرکت ایتمش اولسه ده خطا ایتماش اولور مع مافیه صورت معروضه نک اجراسنه دول ثلثه نک موافقتلرینی جلب ایده بیلیمک ایچون اول باول قونفرانسک قراری و دول ثلثه مذکوره سفراسنک عتبه سنیه یه واقع اولان عرض و اخطاری وجهله بلافاآه وقت مأمور و قومیدیرک فلبیه اعزامی لابدر و یانه سفارت سنیه سندن یازیلوب خارجیه نظارتک تذکره سنیه دون کیجه عتبه علیایه عرض قلنان معلوماته نظراً اوستریا دولتی تدارکات عسکریه یه مبادرت ایلدیکی ا کلاشیلوب بوایسه پرنسک ترک مخصوصه یه عدم موافقتنه و اطفاى ناثره فساد ایچون طرف دولت علیه دن شرقی روم ایلی یه عسکر سوقندن اجتناب اولندیغی اعتقادینه مبنی اوله جق ایسه ده اشبو اعتقاد واهی ایله اوستریانک صربستانى وقایه ایچون بلغارستانه قارشو برسد حکمک وسیله سیله ممالک شاهانه دن ده بعضی لرلی اشغال عسکریمی تحتنه المغه تصدی ایلمسی و بومناسبتله روم ایلی ایالات شاهانه سنده ده سائر قاریشقلقدن دخی وقوعه کلسی ملاحظاتی جای حذر در بناء علیه فرموده عالی جناب تاجداری وجهله در حال تدارکات عسکریه مزک کیفیت و کمیته نظر اعتباره النهرق قونفرانس قرارینک ادبیات فا کولتسی مجموعه سی — ۴

اجراسز بر اقلیمیه جغنه سفرای تآمین ایلمک مقتضی اولدیغندن دائره عسکریه جه بالتدقیق تعیینی ایجاب ایدن حال شمدیکی حالدہ اکرچه ادرنه جهتندہ بولنان عساکر شاهانه نك بر ربعنك سوقیله بالسہولہ قلبیہ واریلوب زمام ادارہ ایالت الہ النہ بیلور ایسہدہ پرنس علیکساندر صرب ایله محاربه یہ نہایت ویردکدن صکرہ روم ایلی شرفی بہ عودت ایدہ جک اولدیغندن نمقدار عسکرلہ کلہ بیلہ جکنک وبوعسکرہ مقابل کرک ادرنه وسلا نیک جهتلرنده بلغارلرہ قارشو تہیئہ اولنان و کرک صربستانہ مقابل حاضر لنوب بعدما اوجہتندہ عسکرک عدم لزومنه مبنی بریدہ کی اردولرہ انضمامی ممکن اولان عساکر شاهانه نك مجموعندن متشکل قوہ جسیمہ نك بلغارلری رد وتنکیلہ کافی اولوب اولدیغنک کسدیرلمسی مادہ سنہ منحصر اولمغله دائره حربیہ دن بو قرارک اخذیلہ قلبیہ کوندریلہ جک مأمورلرک یارین وقومیسرک دخی فرداسی کون یولہ چیقاریلہ رق ابراز مآثر متانتلہ دولترک تآمینی وبر طرفدن دخی دولتر طرفندن برمنوال معروض پرنسہ اخطارنامہ کوندیرلمسی تدابیرینک اجرا آتہ شروع اولنسی ایجاب حالہ موافق کبی مطالعہ اولنمش ایسہدہ اولبا بدہ

ذیل

۶

کامل یا سا طرفنرہ متقدم و ضبط دستیدر محرر مخطره صورنیر

محاط علم عالی اولدینی وجهلہ کتدکجه عموم بلغارستان مسئله سی حکمنی اکتساب ایتکده اولان شرقی روم ایلی مسئله سنک بر مدت دہا تأخر تسویہ سی حالندہ آتیبی حقندہ ملحوظ اولان احوالک عرض و بیانہ اجتسار اولنور شویلہ کہ بلغارلر بینندہ ذاتاً مقرر اولان اتحاد مادہ سی صرب محاربه سنندہ حاصل اولان مظفریتلری اوزرینہ بر قاتدہا تا کدایتش اولدیغندن شمدی دولت علیہ جه بر اتحاد شخصی حصولنک عدم قبولندہ اصرار ایدیلہ جک اولورسہ بلغارلر دولت علیہ یہ قارشو عصیان ایدوبدہ برلین معاهدہ سنی امضا ایدن دولترک مداخلہ لری تحتندہ قالمقندن ایسہ بلغارستانک قرالغنی اعلان ایله دولته اظهار روی مقاومت ایلملری اقرب احتمالدر چونکہ بو حالک وقوعندہ انکلتره بلغارستانہ عساکر شاهانه سوق اولنیمہ جنی وشاید دولتجه عسکر سوق اولنق ایستنسہ بیلہ روسیہ بوکا مانع اولہ جنی اعتقادندہ بولندیغندن انکلتره از بر مدت ظرفندہ بلغارستان قرالغنی تصدیق ایدرک شمدی خفیاً ایتکده اولدینی معاملہ صحابتکاری بی اولوقت اچیقندن اچیغہ اجرا ایدہ جکی وا کرچه دولت علیہ بلغارستانہ عسکر سوق ایدہ جک اولورسہ انکلتره بوکا مانع اولوب روسیہ ایسہ دولت

علیه ایله بالاشترک بلغارلر علیهنده محاربه ایتیه جکی بدیهی وبرزماندنبرو حقوق ملله رعایت ایتیمان فرانسز ایله ایتالیا دولتری حقوق شاهانه نك محافظه سی مشغله سنه اشترک ایتمکدن ایسه بلغارستان قرالغنگ تصدیقنده انکلترونک اثرینه متابعتله غائله دن وارسته وبری اولق ایستیه جکلری شهه سز کیدر بو باده انکلترونک مرامی روسیه علیهنده دیکر بر حکومت قزانمق و ابراز اقتدار یله دولت علییه کنندوسیه اتفاقه میل ایتدیرمک اولوب روسیه نك آرزوسی ایسه شمیدیکی حالدده ذات شو کتسمات شهنشاهی ایله اکثر بندکانی انکلترونه پولتیقه سندن دلکیر اولدقلری کبی انکلترونک مسلك بدخواهانه سنی عموم تبعه شاهانه یه دخی بیلدیروب من بعد دولت علییه کنندوسنه بند ایتمکدر روسیه هر وقت اولسه بلغارلرک میلانی قزانوب پرنس علیکساندری مقامندن دوشیرمک ویرینه روسیه پرنسلرندن برینی نصب ایتدیرمک کنندوسنجه مشکل اولیه جغندن بلغارستان قرالغنی حصوله کله جک اولورسه بوکا اصلا تلاش ایتیبوب کندو آمالنک اجرا سنه وقت وزمان بکلر وبلکه ده بلغارستان قرالغنگ تصدیقی پرنس علیکساندرک تبدلنه تعلیق ایلر .

هر حالدده اشبو قرالغنگ حصولی تقدیرده تصدیقنده توقف ایددجک اولان دولتر روسیه ایله اوستریا و بونلره تبعاً آلمانیا دولتری اولور بو حاله واقف اولان پرنس علیکساندر بلغارستانک استقلالیتی حالنده انکلترونه صحابتنده قالورسه روسیه نك عداوتنه مقاومت ایدمه جکینی واکرچه روسیه نك رضاسنی تحصیل ایددجک اولسه در حال انکلترونه کندو علیهنه قالشه جغنی بیلدیکندن بلغارلرک اتحاد فکرینی تسکین ایددجک شکلده ایشه بر صورت ویرمک البته دولت علیهنک تابعیتنده قالب هم بولندیغنی حال و شانی محافظه و عهده سائر دولترک مظاهرتنه مظهر اولق املنده بولنسی طبیعیدر غضبان افندی نك پرنس ایله اوزونجه برملاقادن صکره عجله در سعادت کلمکی استیدان ایلمسی پرنس ایله بلغارلرک وجه معروض اوزره اولمسی لازم کلان حال و استعدادینه کسب وقوف ایتمندن ناشی اولق کرکدر افندی مومی الیهک درت بش کونه قدر در سعادت و صولی مأمول اولدیغندن معلومات محلیه سی الندقدن صکره صرب ایله بلغارستان بیننده عقد مصالحه اولنمزدن اول ربیع الاول ۳۱۳ تاریخله عتبه علیایه تقدیم قلنان مضبطه خصوصیه ده عرض اولندیغنی وجهله مسئله یه بر حسن ختام ویرمک تشبثاته مسارعت اولنسی اقتضای حالدن کورینور ایسه ده اولباده

فی ۲۴ ربیع الاول ۳۰۳ و فی ۱۹ کانون اول ۳۰۱

علی فوار